


名山藏

典謨記十一之四




漢書門			
二	三	九	類
九	二	九	架
四	〇	〇	架

內閣文庫			
三	二	二	漢
六	二	二	書
四	二	二	架
一	四	九	架
〇	〇	〇	架

內閣文庫		
番號	漢	2229
冊數	40	(5)
函號	286	77

五



名山藏卷之十一

淺草文庫

臣何喬遠恭輯

典謨記

英宗睿皇帝

英宗睿皇帝御諱祁鎮宣宗皇帝嫡長子以宣德二



年年生之日日下五色雲見光灼殿陛既二年立為

皇太子能言宣宗抱置膝上問他日為天子能令天

下太平乎曰能問有干國之紀者敢親總六師討之

乎曰敢宣宗大喜解所御龍袍寶帶加上體置寶座

左右皆呼萬歲上天姿秀傑龍顱魁碩顧盼有威立



名山藏

卷之十一

典謨記

一

其側者皆若傍睨之宣宗崩以正月壬午即皇帝位
 九歲矣頒詔大赦天下以明年為正統元年癸未營
 建大行皇帝陵丁酉上尊諡勅沿邊總兵官嚴守備
 命戶部尚書黃福參贊襄城伯李隆幾務於南京命
 廷臣會舉文武大臣鎮守江西湖廣河南山東勅朝
 鮮國王李禔曰朕嘉與天下安於清靜王國朝貢一
 循舊章非常貢悉止之戊申尊皇太后為太皇太后
 庚戌尊皇后為皇太后辛亥冊弟祁鈺為郕王賜臣
 民白金絹布鈔錠勅諭南北兩京五府六部都察院
 南京內府各監局等衙門曰朕體祖宗安養軍民之

心凡事從簡可簡之事公議以聞於是諸司冗費悉
 行裁罷勅三法司錦衣衛詔書赦外再別犯者情罪
 以聞戍邊輸作之命成國公朱勇新建伯李玉提督
 大營五軍三千等營官軍操練三月放教坊司樂工
 三千八百餘人江西賊曾子良等平先是江西連年
 有司不能賑恤曾子良率水豐新淦樂安等縣聚眾
據大盤山為亂至三萬餘監察御史程富與三司前
 後擒勦子良為亂
 軍所殺餘黨潰散勅諭三法司錦衣衛刑科都給事
 中自今死罪臨決須三覆奏行在禮部尚書胡濙等
 奏比奉勅旨節一切冗費而四夷使臣動以百數疲
 於供給宜勅邊官審其來者量遣正副使從人赴京

餘悉畱彼給待從之贈皇庶母殉葬者十妃四月諭
行在兵部尚書王驥曰比聞河南軍民有困迫饑饉
流離就食因而群聚爲盜原其初心良可矜惻爾兵
部卽出榜文諭之榜至悉宥罪祀唐韓愈於潮以元
學士吳澄從祀孔子廟減差行人禁約私茶員數遞
減在京韃官月俸給米丙辰月食脩葺長獻二陵置
石人石馬於御道東西天久不雨命考察群吏方面
及郡守有闕令遵宣宗皇帝勅旨保舉若犯贓罪并
坐舉者命三法司有犯罪卽會官覆審毋淹兩畿山
東河南諸府蝗蝻傷稼命御史給事中馳驛往捕五
月命吏部初入仕者毋輒銓除風憲監察御史有闕
都察院堂上及各道官保舉以聞吏部審察不謬然
後奏授賑揚徐滁及諸屬邑饑命河南山西鎮守巡
官招撫逃民復業免其徭賦諭禮部朕念祖宗忌晨
食稻衣錦非心所安其與翰林院議忌日禮以聞大
學士楊士奇等請其日服淺淡色衣不鳴鐘鼓視事
奉天門從之革兩京都察院交趾道并戶部刑部交
趾司以旱澇命覆死獄遣監察御史給事中點視邊
軍命監察御史往揚州等處緝捕鹽盜准巡按例歲
一更薦宣宗陵號曰景陵六月辛酉奉葬大行皇帝

乙丑祔廟勅南京法司會審重獄七月脩宣宗實錄
 嚴私下海捕魚禁八月減光祿寺厨役四千七百餘
 人封乳母李氏為恭聖夫人九月龍州宣撫司獻瑞
 麥上以所在旱蝗相望獨此麥瑞何以免民饑自今
 天下凡若此類皆毋獻十月立天下衛所學較諭行
 在吏部方面郡守九年陞用與大臣會議使常流不
 得倖進十一月戊辰朔日有食之行在吏部言御史
 員缺請奪情補用上曰非盛世令典不許勅行在兵
 部臣曰比聞順天直抵山東府州縣歲歉民艱所養
 馬匹死損合追賠買補者俱俟來歲收成後命天下

布政司都司嚴督所屬栽種桑棗儒士盧忠以經明

行脩應薦吏部驗忠軍籍當補伍上命試之試可用

擢為教諭曰戎伍得人孰與學較得師十二月妖賊

張普祥伏誅

普祥真定衛軍以妖書惑眾潛居井陘縣自號七佛祖師遣其黨往河南山東

山西直隸等處度人約先取彰德以次奪諸城其黨百餘人入磁州城焚千戶所官軍攻敗之普祥竄伏相鄉縣遞運大使魏景原擒獲之械送京師伏誅 命少傅兵部尚書兼華蓋

殿大學士楊士奇少傅工部尚書兼謹身殿大學士

楊榮行在禮部尚書兼翰林學士楊溥輪議建言事

行在刑部右侍郎吾紳言臣奉命考察群吏雖已悉

詳尚恐人心變態遂失其初乞勅行在吏部今後方

面守令給繇赴部仍會在京堂上官考覈從之

元年正月以京軍數多令餘丁於北京曠土屯種勅

中外群臣敬職勤事減陝西苑馬寺官吏二月禁內

外法司鍛鍊刑獄嚴逃民不復業之禁擇通經秀才

為教官教書公侯家三月改建廣邑州四月命行在

禮部右侍郎王士嘉等五人捕蝗畿內

王士嘉武城人永樂初繇

國子生選任知縣歷官工部員外郎宣德中薦陝西

參政清譽大振正統初召為禮部右侍郎後以年老

致仕卒年八十餘為人端謹鉅以公侯伯位久祿厚

細畢飭士大夫推為慳慳君子無事征伐而百姓連年艱供億馬匹草料悉停罷之

五月罷脩南京冰池冰窖減慈恩隆善能仁寶慶四

寺番僧勅行在右都御史顧佐御史有嘗犯贓罪及

暴酷枉死人者悉降黜之他諸衙門官一聽堂上官

考察有徇私容隱御史舉劾之增設提調學較官南

北直隸御史一員各省按察司官一員起復刑部郎

中謝莊為西安知府給驛赴任閏六月嚴自宮禁罷

陝西織造駝毼靜縣蝗饑有司徵索如故上聞命撫

按官分投驗視凡被災處悉免其物料稅糧諭行在

禮部山陵祭祀百官毋華服皆淺色衣從朕如洪武

永樂故事命行在都察院舉可御史者理刑半歲乃

除授八月命提調學較風憲官兼督民間栽種桑棗

折收江南金帛以當租稅免輓運之勞命錦衣衛帶俸食糧官較有小技者自食其技有爲諸王公主守莊守墓者自食其力四夷降附老弱者悉就食南京以省冗費九月分遣監察御史軒輓等十七人清理天下軍政命攢運糧儲總兵官若巡撫侍郎明年八月至京會議軍民利便命錦衣衛貶刑囚刑部者齎駕帖以防僞命邊郡民犯罪者聽納米麥豆自贖封黎麟爲安南國王淮河清十月命北虜降人非率所部及眷屬來歸者俱發遣江南衛所管束聽征調十一月麓川宣慰思任發侵孟定府及灣甸等州黔國

公沐晟以聞下兵部議處之命逃民卽占籍於寓所毋游食而不賦命在京三品以上官各舉可御史者一人四品官及國子監翰林院堂上官部屬科道官舉可知縣者一人吏部察用之十二月故和寧王所部阿台王子及朶兒只伯數寇邊下兵部會廷臣議五日不上奏上曰謂朕冲人耶執兵部尚書王驥侍郎鄜埜下獄遂勅都督蔣貴寧夏總兵官都督同知史昭大同總兵官都督同知方政等出兵勦虜二年正月勅大同總兵都督方政寧夏總兵都督史昭都督蔣貴等率兵二萬出境巡哨遇虜賊相機勦

殺巡撫大同右僉都御史李儀言和寧殘虜窮無所歸乍臣乍叛小爲邊寇此常情也嚴烽火謹斥堠練士馬待其自遁則無事矣今重兵出境棄所守地僥一勝賊倘偵伺襲我空虛非策也上是之三月增雲南儒學師生廩米籍重囚出免死者乙巳月食大名河陝諸處逃民先後入山抵漢中府深谷中潛住以四五萬黃河北岸亦有千數團聚命監察御史金敬撫輯之勅諭曰皆朕赤子願還故鄉者令有司善加綏撫願占籍者復二歲四月遣官督捕蝗於畿內山東河南諸府諭行在禮部臣曰先王盛時四夷之獻

惟服食器用毋有珍寶毛憐等衛撒滿荅失里貢珠本意却之宴使者而予之直聊酬遠誠毋以爲例五月鄭州儒學訓導郭明郁奏本州榮澤孝義保漢紀信死節地遺墓尚存祠廟靡立乞下禮官議下廷議封信榮澤侯諡忠烈有司立祠致祭浮梁人胡有初等十人各出稻千石佐賑賜璽書旌勞復其家自是爲故事六月禁罷閒吏及奸民結攬寫發把持官府起滅詞訟者以宋儒胡安國蔡沈真德秀從祀孔子廟命副榜舉人不願就教職者入監讀書申明生員學書習射之業申明內外官免原籍差徭禁部民綁

縛有司赴京命行在都察院右副都御史賈諒工部侍郎鄭辰賑饑江北諸府命諸番國三歲一貢七月以淮揚饑弛所屬川澤之禁時達官軍較勇士人等居止畿內多占民田地相聚騎射強掠民財詔錦衣分捕之犯死者於犯所梟首徒流者發邊衛充軍仍罪其頭目十月命中軍左都督任禮佩平羗將軍印充總兵官左軍右都督蔣貴充副總兵左軍都督同知趙安充副總兵兵部右侍郎柴車右僉都御史曹翼羅亨信俱參贊軍務率領軍馬勦捕虜寇阿台朶只伯諭行在兵部揭榜有壯勇膂力通武藝願自効者在京許赴通政司沿邊赴總兵官自陳亡論奴隸亡命坐罪人一槩試用有謀略出衆者不次擢十一月封哈密脫脫哈木兒爲忠義王

三年正月二月庚午月食三月東平知州傅霖言陛下卽位却珍奇之獻罷不急之征取回內官糧儲之事以命巡撫侍郎清軍之事以命監察御史天下歡欣歌誦聖澤而徐臨等倉仍用內官收糧淮浙等處鹽場仍遣內官併錦衣衛官較緝捕以臣愚見所在收糧自有州縣官員巡鹽已有監察御史內臣錦衣絡繹四出瘠民膏血安所用之上嘉納焉禁天下祀

孔子於釋老宮四月任禮蔣貴擊敗胡虜朵兒只伯于石城兀魯乃趙安等亦出昌寧大擊虜衆封禮寧遠伯貴定西伯安會州伯予行在兵部尚書王驥兼俸柴車曹彝羅亨信俱陞俸各賞勞有差脩宣宗皇帝實錄成命監生入監者皆從原籍科舉出身勿歷事諸司以圖僥倖五月命行在吏兵二部曰先朝嘗書在外庶官姓名於武英殿南廊或書奉天門西序以備觀覽是以遠近聞風濯磨中都畱守司各都司布政司按察司官姓名爾等其書揭文華殿東西壁朕考其賢否進退焉脩葺天下府州縣申明旌善二

亭六月黔國公沐晟奏麓川宣慰思任發累侵南甸干崖騰衝潞江金齒等處上勅晟相機勦捕已命右都督方政署都督僉事往雲南與晟協同鎮守使右都督沐昂率兵討之思任發殺掠瓦甸順江江東等處行在吏部尚書郭璉為朝臣考滿者請勦階上曰勦階所以寵百官例授罔勸初考不稱者勿濫與之

郭璉圻內新安人初名進宣宗改名璉起家太學生永樂中任戶部郎中為上所知璉天資質厚臨事從容不見愠喜精練吏事簡而有條累遷吏部左侍郎已代蹇義為尚書上以呂蒙正夾袋虞允文材館錄故事勉之李賢舉進士璉試賢嘉禾詩謂其有公輔才授驗封主事屬歲旱言者謂大臣尸位妨賢宜令自陳遂皆乞去璉曰先帝以幼主託吾儕自潔其身置天下事誰理乎宜引罪乞改過璉老矣官至太宰

豈復貪位顧義不得不爾雖兼銓十四年矢心廉潔崇實行抑浮薄杜請謁雖時為內閣所侵然能持正堅忍自命祭孔子先師非土所產者鹿兔代以羊榛

棗代以果十一月諭右副都御史陳智今武臣子弟忘祖父起家之艱漫不省武藝赴京比試多有過期及覓代者自今犯者全家戍邊官吏受賂及不審實一體治罪勅沐晟沐昂方政等擊思任發潞江破之十二月復命監察御史巡視淮浙鹽課禁江西窩場燒造青花白地瓷器貨賣餽送違者正犯處死全家戍口外

四年正月沐晟與沐昂方政進攻思任發麓川大寨破之追至空泥敗績失政所在賊勢益眾二月益沐晟官軍更擊之三月巳酉朔大赦天下增山東西陝西河南湖廣方面官各一員招撫逃民四月壬辰月食黔國公沐晟以師敗病悸卒五月以沐昂為左都督佩征南將軍印充總兵官代之遂命右都督吳亮充署副總兵都督僉事馬翔充左參將署都督僉事張榮充右參將從昂征勦思任發鳳陽開封兗州濟南諸府蝗命捕之壬申京師大雨水溢壞官舍民居溺死人甚眾人多露宿長安市六月京師地震命工部右侍郎邵旻等擇亢爽地及各廠房居軍民無屋

者戶部右侍郎吳璽存問被水家給米一石溺死者
加鈔五百貫丁酉以京畿大水遣祭告于昊天上帝
后土皇地祇勅群臣脩省七月遣道士齋祝幣往命
所在守臣祭歷代帝王陵寢命順天府脩元世祖廟
辛酉月食命行在六科十三道廉在京諸不法事行
在工部給事中吳昇言邇年御史命三品京官舉保
臣謂御史既從保舉則顧戀私恩大臣卽有奸回不
法孰肯彈劾乞停止之上是昇言下行在禮部會議
議上命自今御史員缺第從吏部於進士監生及教
官儒士出身俱歷一任考稱內選其操行端潔政理

疏通者送都察院理刑半歲本院覆試堪任者具奏
擢用之命公侯伯都督諸武臣隸成國公朱勇操習
內外文武大臣并巡按御史各舉堪任武職者令御
史給事中任滿九年果廉幹者都御史掌科給事中
連名奏保吏部廉實具奏陞擢後坐贓罪逮治舉主
八月以畿內旱澇相仍人民流困勅行在都察院右
僉都御史張純巡視撫卹之南安知府林芊言比者
提督學較僉事薛瑄建議凡生員疾病不堪教養者
罷黜之追償給廩臣謂疾病人所時有罷之足矣給
廩累歲追償一朝且使父兄懲徵納之患則孰遣子

就學者命行在禮部除其令十月勅諭行在禮部都察院曰風憲之官所以肅僚貞度也憲綱一書肇於洪武厥後官制不同所宜因時改書而中外憲臣有任情增益者先帝嘗勅禮部同翰林儒臣考舊文申明之益以訓戒之言臣下所增竝從削去書成而先帝上賓朕今考定益以見行事宜爾禮部其卽頒布中外諸司都察院通行諸道御史及按察司官敢有不遵必罪不恕十二月脩建乾清宮勅行在都察院右僉都御史張純於順天保定河間永平四府大理寺右少卿李畛於真定順德廣平大名四府往來巡

視民瘼

五年正月真定太原所屬州縣招撫逃民復業三萬餘戶令有司善加撫綏免租役三年諭行在戶部臣曰去歲畿甸及山東西河南蝗恐遺種于今歲速下所司捕滅之令北方民出穀五百石賑濟者旌爲義民優免其家口外民能出米豆三百石者亦如之令南北直隸河南山西諸處逃民復業者有司優卹不服招撫者罪之二月行在光祿寺厨役白大有奏父年八十無他子乞歸養上曰禮八十者一子不從政卽遣之以畿內灾民食不贍勅張純李畛區畫賑濟

給京城畿民飯三月造奉天華蓋謹身三殿乾清坤
 寧二宮以畿內饑復民二年家有父母者人賜二石
 米以南京暴風雨北京烈風屢興遣祭告于天地宗
 廟社稷山川諸神四月以山西荒下寬卹詔兩畿河
 南山東蝗遣捕之六月疎滯獄賑宜川縣饑令進士
 觀政一年監生歷考中并坐監三年以上有學識者
 繇吏員出身授官歷兩考廉潔守身志在愛民才識
 相稱者悉得保舉縣令送吏部考用後犯贓罪連坐
 舉者陝西旱饑甚命賑之七月命行在刑部右侍郎
 何文淵等分行兩畿諸省脩備荒之政八月行在戶

部奏大同宣府歲稔旗軍給糧請代以布上曰邊士

執戟而暇耕乎稔亦給之九月造渾天儀璇璣玉衡

簡儀成御製觀天之器銘

銘曰粵古大聖體天施治敬天以心觀天以器厥器

伊何璇璣玉衡璣象天體衡審天行歷世更代垂四
 千禧沿襲有作其製寢備卽器而觀六合外儀陽經
 陰緯方位可稽中儀三辰黃赤二道日月暨星運行
 可考內儀四游橫簡中貫南北東西低昂旋轉簡儀
 之作爰代璣衡制約用密疏朗而精外有潭儀及而
 觀清上規下矩度數方隔別有直表其崇八尺分至
 氣序考景咸得懸象在天制器在人測驗推步靡忒
 毫分昔作今述爲制彌工旣明且悉用將無窮唯君
 勤民事天首務民不失寧天其予顧政十月中外官
 純於仁天道以正勒銘斯器以勵予敬

缺命吏部會廷臣舉可任者旣舉復命尚書郭璉精
 覈之復戒兵部臣曰自今會舉武職須精察允當不

然爾爲首罪蘭縣莊浪同以月朔地震十日乃止壞城堡官民廬舍壓死男女二百餘人勅三司脩葺賑卹之十一月行在工科給事中吳昇言中外言事有切直者會議之時執政或因中已病或見與已乖故輒回護駁令指實乞勅自今會議可行則允不可行則止毋駁言者以通下情上嘉納之昇復言近例方面官令在京三品以上官薦舉縣令令在京五品官薦舉若此則賄賂請託生矣給事中御史九年任滿令都御史掌科給事中連名舉薦陞用若此則人悅求進莫肯持正慮見忤矣乞一歸其責於吏部上命方面官府州正官如先朝勅旨會舉知縣吏部自選授之給事中有才行者同御史例舉九載任滿者吏部考覈推用因勅吏部毋朋比請託如有濫薦卽以奏聞以杭嘉湖三府水患未消流移未復命浙江布政按察各選一人專理預備之政十二月脩中和韶樂器先是四夷朝貢使皆給馬出入至是始令給正副二使而止增鄉會試取士額勅曰欽天監言歲朔日食凡九十一鈔故事食不一分者不救護朕惟敬天之變毋敢豫康况茲獻歲其以是日免賀行揀護禮如常儀

六年正月己亥朔日如不食行在禮部請賀不許麓川寇思任發未平復命定西伯蔣貴佩平蠻將軍印充總兵官都督同知李安充左副總兵都督僉事劉聚充右副總兵都督指揮使官聚充左參將都指揮僉事冉保充右參將行在兵部尚書兼大理寺卿王驥總督軍務統率大軍往征之三月勅諭太師英國公張輔及五軍都督府兵部臣京師操練官自都指揮而下有通曉兵法智略優長才堪御衆者經歷戰陣有技勇者具舉以聞朕將親閱焉輔等推選得紀廣等四十四人上令讀武經百將傳講略練武待試

而用之癸亥南京大風折孝陵樹三百餘株壞官民舟溺死者五十餘人四月禁僧道私創院觀命行在戶部右侍郎陳瑞通政司右參議王錫大理寺少卿顧惟敬等分督捕蝗於畿內及南京江北諸府以去冬迄今雨雪稀少烈風屢興蝗蝻萌發遣分告于天地社稷山川諸神勅三法司慎選所屬官分審天下疑獄既推擇監察御史張驥刑部郎中林厚大理寺正李從智往賜勅以行

張驥陝西人化人繇鄉薦授監察御史是行也之福建出

誣幾千人還遷大理寺丞賑濟山東東民以寧還陞右少卿復命巡撫山東直隸淮揚等處福建浙江盜起命驥撫捕賊平命鎮守浙江

尋卒驥剛方廉慎為時所稱

五月命行在刑部右

侍郎何文淵大理卿王文審在京刑獄巡撫南直隸
行在工部左侍郎周忱行在刑科給事中郭瑾審南
京刑獄勅分鎮諸勳臣督軍衛有司於鎮所捕蝗六
月監察御史曹泰言蝗蝻水潦皆大小臣奉職亡狀
所致乞令科道官指實劾奏仍令堂上官考察所屬
選擇廉公大臣分行天下考察上可其奏已科道交
劾尚書郭璉等上姑恕予自新已璉等上章伏罪請
矢心選擇大臣考察在外官吏上亦罷之勅曰間者
畿內旱蝗朕心警惕有言大臣所致朕明下其章俾
之脩省而言官指摘過當朕慮混淆悉置不問乃犯

者不悔過言者猶忿攻今最甚者皆已罷黜爾大小
官員宜益勵厥心洗改焉八月賑常池二府饑諭都
察院曰朝廷優士至矣將領不卹輒私役爲工匠月
日亡休沿邊軍屯操稍暇邊將亦輒令捕野味治薪
炭勾至補伍者所隸官盡索其攜何怪不貧窘逃竄
也今犯者與法司執之九月奉天華蓋謹身三殿乾
清坤寧二宮成賑豐沛二縣饑十月總督雲南軍務
兵部尚書兼大理寺卿王驥奏雲南按察司僉事徐
觀大理知府賈銓楚雄知府馮洧餽運有方乞量陞
轉以示褒勸下吏部尚書郭璉請如驥請上曰賊未

平而陞餽運之官先事也功成後論叙班賞人其孰不然璉頓首謝行在戶部尚書劉中敷侍郎陳璽吳璫等慮京城草束乏請以御用牛馬分牧之民間上示奏於言官皆劾中敷變亂成規遂下獄廷議當斬命枷之已乃釋蠲畿內荒田稅十一月甲午朔上御奉天新殿大赦天下罷稱北京行在冠南京二字於南京諸衙門新充國復聖公廟成閏十一月贈故翰林待制王禕官賜諡王驥蔣貴攻思任發于上江破之十二月大破之思任發遁走悉平其地命廟祀平江恭襄侯陳瑄

七年正月南京西安門火革陝西甘肅茶馬司命吏部左侍郎魏驥等五人分往北京及南京江北諸郡督有司預絕蝗種以麓川寇平使都知監左少監蕭保鎮守雲南三月壬戌朔上詣天壽山展祭于三陵甲子還京四月遣戶部左侍郎王質以羊酒途勞蔣貴王驥凱旋將士悉給舟車餼廩五月進封蔣貴定西侯王驥靖遠伯從征將士悉論功乙亥月食戊寅冊立錢皇后己卯詔天下賑巢縣饑八月以思任發未就俘復命王驥往雲南總督軍務仍給金牌印符便宜行事九月西安府及耀州產嘉禾止群臣賀十

月太皇太后不豫禱太廟行人司行人尚褫言二事
一大臣位任去天子不遠者也古者黥劓不及大夫
今或被言官彈劾或罹旗較緝訪露頂跣足束縛奔
命若繫囚然事實尚可儻涉虛妄行當復職則今日
衣冠之卿執卽昔者窘辱之囚拘非所以重體也請
自今有犯者命錦衣衛官召至午門勅諸大臣以禮
會問踪跡可驗疏上輕重如其無端卽奏復職一旗
較緝事未必悉實有爲他人報讎或以自洩私忿倒
置是非誣陷平民請今不實所緝者量罪輕重以半
坐之下刑部集議褫言可采而律例無文上命旗較

察不實者坐罪太皇太后不豫久思見襄鄭荆淮四
親王遂召之乙巳太皇太后崩十一月庚申上尊諡
曰誠孝皇后詔天下壬申月食在井十二月禮部臣
奏山東左參政沈固右參政劉璉竝言中外官舍軍
民戴帽穿衣語言跪拜尖頂秃袖垂纓插翎竝學胡
俗請令都察院嚴榜戒治從之己卯祔太皇太后主
太廟

八年正月命吏部左侍郎魏驥等八人分往南北兩
京滅蝗種陞大理寺右寺正李從智爲蘇州知府勅
遣之二月裁省南京官員勅諭尚膳監內官供養若

御膳若宮中食物之用毋不潔蠲褻神而耗費襄王
淮王荆王至京改封荆王于蘄州鄭王于懷令天下
里置木鐸誦教民六諭如高皇帝舊三月令戶部榜
諭天下民流移境外願占籍其處者聽仍免役三年
願復業者記名優恤秋成遣之公私逋負悉與蠲除
巡按直隸監察御史趙勗奏皇上承列聖之緒躬履
節儉子育元元甚大惠也夫何郡邑守令未盡得人
凡遇水旱災傷慮煩勘覆輒匿不聞間有上陳部司
又以國用不敷不爲停免是致凍餒貧困轉徙流移
臣見鳳陽潁川一帶扶老攜幼風栖露宿者動以萬
計詢其所自皆真保二定山東諸郡民因累歲荒歉
稅糧孳牧逋負者多有司不量情力且責償遠年賑
濟糧米饑窘轉切筆楚日加若不轉徙何以自存乞
廷議便利凡天下旱澇之處一應應徵錢糧鹽鈔并
孳牧雜辦賑濟倉糧悉皆停免仍取勘缺食之人不
問土著流移驗口賑給自今殿最守令一以戶口增
減爲差上從其言致書鄭王瞻垓曰比念皇考同氣
至親久處封國特名諸叔及宮眷子女來京不幸皇
祖母遐棄痛何可言近襄荆淮三叔王次第具至叔
獨疾不果來悵然在念茲特齎奉金銀綵幣鞍馬諸

物兼賜世子郡王郡主叔宜勉進藥食遠副瞻望襄
王荆王淮王還國南京都察院右僉都御史張純奏
宋臣包拯謂古禮人臣七十致仕所以優崇老成且
開止足之端也歷代皆行國朝尤重切見內外文官
有踰厥紀亦或年及者精神昏晦在公日少請急時
多曠廢甚矣間有畏清議勉告致仕吏部又以精力
未衰奏留如故彼此相蒙乞申明古禮有因循覬覦
之輩許給事中奏黜其倚重眷留無可去之義者自
難繩拘上示純奏於吏部令先以純言曉諭許其自
陳蓋自是多有致仕者命吏部咨訪廷臣尚書王直
疏戶部右侍郎王質兵部左侍郎鄺埜刑部員外郎
劉廣衡監察御史張驥以聞上卽陞質爲刑部尚書
四月免鳳陽靈璧二縣被災夏以久旱遣祭于天地
社稷山川諸神五月翰林院侍讀周叙上言時政及
郡臣不職上示章諸大臣皆引罪自訟上命加愍慎
以副朕意思任發子思機法復據麓川侵擾復命定
西侯蔣貴充總兵官佩平蠻將軍印都督冉寶毛福
壽充參將兵部尚書靖遠伯王驥總督軍務調雲南
湖廣四川貴州官軍土兵五萬征之己巳月食戊寅
雷震奉天殿鷓鴣已卯上輟朝三日遣祭于昊天后

土勅諭文武群臣曰朕顓顓之誠不遑夙夜上天垂戒厥有所繇典祀之官誠弗至歟養民之職政失當歟軍旅之臣令過苛歟銓選之仕進退乖歟爵賞之行明公不盡歟至於刑罰過當尤干陰陽抑訴寃有詞菴結不理指告有禁違例故行歟或操不潔白受人賄囑或聽不明公爲人脇制誣枉平民傳致其罪歟朕思省惕懼爾群臣其卽革心改慮勉効自新天道顯明可忽違哉壬午大赦天下六月翰林院侍講劉球下獄死以駁死罪囚不實下大理寺左少卿薛瑄賀祖嗣右少卿顧惟敬等獄七月論薛瑄死罪枷

國子監祭酒李時勉於監門之外已乃釋之八月復宋儒周敦頤程顥程頤司馬光朱熹子孫十月禁勅內官內使毋與外庭私相交結囑托營求勅內外官員毋交通作弊畏勢圖賄以致那移文武銓選出入囚罪勞敝軍民脩國學十二月營建靜慈仙師墳命太常寺凡遇時節依例祭祀

九年正月元良哈三衛陰寇邊命成國公朱勇興安伯徐亨都督馬亮陳懷等分勦之命兵部右侍郎虞祥等五人分往南畿巡視督捕蝗種二月以西番僧朝貢衆多勞費軍民勅甘肅鎮巡官自今如例起送

餘留其處管待所進馬就彼給軍騎操方物貯庫第
其數來聞有所欲言譯實處置善撫諭之三月辛亥
朔上幸國子監始復晚朝御製重建太學之碑以雨
雪愆期遣祭天地社稷山川諸神命征進雲南達官
舍人家屬給絹二匹布三匹有願省視者給口糧脚
力封陳懷平鄉伯馬亮招遠伯四月以雨澤愆期遍
告于群神監察御史朱本等言三事一去冬少雪今
春不雨饑饉薦臻咎在臣下乞勅大臣率屬脩省不
俊者許言官指實彈糾天下貪酷官吏皆考覈之一
刑官人命所繫今在外按察司及斷事理問推官多
不諳律乞加精選一在外儒學故以舉人任教官比
因任滿生徒應舉乏人行充河泊等官續將年深監
生選補往往廢職不能育才宜遴簡之用稱模範上
納其言論吏部尚書王直等曰在廷群臣俾共乃職
府州縣官不稱者巡按御史布按二司官廉察罷黜
之其貪酷者布按二司官御史一體舉劾刑名官當
選有學行通律意者教官當選有文學者教官任滿
九載生徒如無舉人試學果優許任如故監察御史
曹泰言今布政使卽古州牧按察司卽古監司近歲
有缺必令大臣會舉然或循資格或涉親故任之者

昏耄時有庸懦亦多乞精厥選上然之諭吏部以旱分遣翰林諸臣祭岳鎮海瀆鍾山之神命教官任滿無舉人試學優者教授學正教諭俱降訓導訓導調任邊遠試不中者除雜職五月靖遠伯王驥等執麓川叛賊思機發男菡蓋等至京沒入御馬監養馬會錄兩京疑獄癸亥月食七月重開福建浙江銀場令天下岳鎮海瀆府州縣社稷山川文廟城隍及祀典神祇壇廟有損壞者有司以時脩葺令有司掩瘞暴骨禁發掘墳塚者壬寅雷震奉天殿鳴吻上親告于太廟遣祭于吳天后土勅戶部曰南北直隸被水災

絕多朕甚憫焉爾戶部其令所司加意存卹缺食者賑之蠲其租及歲辦物料命都察院揭榜禁約在所豪橫之徒巧科斂尅害軍民者八月飭將帥無培尅軍士申明習尚胡虜衣服語言之禁刑科給事中鮑輝言府州縣官九年考滿多因在任買田置宅娶妻立籍恐遷別處要民保留弊政爲甚下吏部言保留舊例不可以一妨十惟宜申明所隸上司嚴加覈覆上令巡按御史布按二司及該府官自今從公覈具實奏聞有徇私罪之大理寺卿俞士悅等言文職受財枉法滿貫當絞者例充軍不滿貫者竝贖爲民武

職坐流徒杖者例槩充軍夫武職出萬死得官例槩充軍則前功盡棄罪反重於文職乞令武職受賊私縱探卒滿貫當死者充軍其餘不滿貫當流徒杖者如舊贖罪還職從之九月命靖遠伯王驥右都御史陳鑑整點軍馬於西北沿邊以麓川平立雲南隴川宣撫司十月丙午朔日食命大同總兵官武進伯朱冕寧夏總兵官都督同知黃直鎮守延安綏德都督僉事王禎守備偏頭關都指揮馬貴巡視塞外己未月當食不食甲子誠孝昭皇后祔廟頒釋道大藏經典於天下寺觀十二月令囚雜犯死罪以下遞減二

寺答杖罪悉宥之休息工匠赴役待明歲

十年正月命吏部都察院會同禮部察來朝司府官令各察所屬治行具最以聞既浙江都轉運鹽使司運使丁鏊鞏昌知府韓福南昌知府胡本惠寧國知府袁旭松江知府趙豫鳳陽知府楊瓚海豐知縣王懋霸州知州張雷吳縣知縣葉錫慶雲縣典史趙亮察最命人賜金織衣一襲鈔五百貫宴禮部吏部錄姓名叙擢之舉將才二月申驀越誣告禁誣十人以上者軍發遠邊衛民遷口外三月甲戌朔上謁祭于三陵乙亥還京師申禁私創寺院庵觀勅鎮守陝西

右都御史陳鎰巡撫河南山西左少卿于謙曰近得御史馬恭奏陝西遠近居民求食日有二千餘人餓死數多咸陵渭南富平等縣閉門塞戶逃竄趨食及爾謙奏祥符境內饑民屯聚男婦千餘原武亦如之朕卽位以來輕徭寬負詔書屢矣今歲歉未甚流散若此豈非府州縣官侵暴之耶又聞衛所官亦往往剝害諸軍士方面風憲與同流汗疾苦不在心是皆不可原今姑予自新其各飭令正佐能幹官分巡所屬量發廩或勸富家賑貸不急之務悉爲停止有所不便其實以聞逃移至境者設法安插之爾等爲國

重臣宜盡心區畫有司官貪暴闖茸者起送赴京軍官具奏處治欽哉復分勅陝西河南山東西三司及近畿諸府四月甲辰朔日食復閉浙江福建銀場五月廣西潯梧諸府蠻寇竊發總兵官安遠侯柳溥率兵勦殺斬首七百三十五級平鄉伯陳懷奏薦山西行都司都指揮僉事吳浩將材宜召用之京師上曰正可障邊因命兵部臣有邊材者自今毋輒動六月以西安紹興寧波台州諸府大疫遣祭于西嶽南鎮之神爲民祈福死者蠲其租病賑卹之七月巡撫河南山西大理寺左少卿于謙奏山陝饑民俱餬口於

河南懷慶河南有貯米六十餘萬請減糶上許之命
戶部馳報母緩復荆王瞻堦書曰承諭漁於蘄州之
赤東湖朕特允請然山澤之利自昔共民叔氏宜體
此意八月命黔國公沐斌佩征南將軍印充總兵官
鎮守雲南乙巳遣祭于司鍾之神曰惟神職司禁鍾
朝儀是肅茲晨扣擊失常朕惕政乖特申祭告命戶
部左侍郎李暹覈儲於河陝酌糴買以備邊九月諭
吏部尚書王直曰給事中職封駁糾劾非行誼莊飭
才識優長儀偉言端曷克稱之今後慎選毋以輕異
乙亥吏部右侍郎趙新言銓衡四事其一人無全才

古今皆然身言書判法固當因器使隨才亦或不遠
若責短棄長捨僉議而自用變舊典以徇私則選任
失宜矣其二薦賢臣忠考察才彀也今孝謹人才有
司舉到不辨真贗輒自發回匪惟蔽賢抑且違詔其
三各衙門送到辦事年滿官員挨次取選故事也今
不論月日先後却候積累人多雜亂文狀隨手取寫
謂之公道後薪前魚欲人無怨不可得也其四官吏
詐匿親喪厥罪惟均今匿喪者罷爲民而詐喪者職
役如故禮法乖違輕重失等臣敢冒昧以聞上一從
新言命詐匿親喪者竝爲民著爲令十月丙午上畋

名山藏 卷之十一 英宗一
于南海子命吏部與諸尚書都御史推舉堪任六部
侍郎者於是以翰林院學士錢習禮爲禮部右侍郎
侍讀儲懋爲戶部右侍郎吏部郎中曹文爲本部右
侍郎十二月真定府所屬州縣野蠶繭知府玉以絲
束獻製幔褥陳于太廟之神位雲南千戶主政誅思
任發于緬甸

名山藏卷之十二

臣何喬遠恭輯

典謨記

英宗睿皇帝

十一年正月賜司禮監太監王振及各監太監錢僧
保高讓曹吉祥蔡忠白金寶楮絲幣諸物命振姪林
爲錦衣衛世襲指揮僉事僧保等弟姪俱爲錦衣衛
世襲副千戶賜振勅二月有異氣現華蓋殿金頂及
奉天殿鴟吻之上遣告于上天后土以春和下寬卹
之詔三月丁丑上展祭于三陵庚辰還京癸未月食

四月命蘇州府知府朱勝乘傳赴任勅諭之七月選朝覲卓異九月勅諭漕運總兵及諸巡撫官曰租稅出民漕輓以軍勞苦矣所司不卹復侵擾之卿當加意暴官汙吏必致之法十二月以甘州等處疾疫遣左通政王錫祭西嶽西鎮太常寺寺丞李宗周祭境內山川

十二年正月申明僭用織繡蟒龍飛魚斗牛及違式花樣之禁二月命戶部右侍郎一員專巡視倉場命翰林侍講等官杜寧裴綸劉儼商輅江淵陳文楊鼎呂原劉俊王玉日讀書東閣學士曹鼐陳循馬愉爲之師以次侍經筵禮科給事中言鈐選經也保舉權也仰惟太祖太宗之世一凡鈐選吏部專職之仕版得忠良豪門無奔兢宣宗時慮有遺伏爰命大臣旁求俊乂布按二司知府有缺令京官三品以上保舉初意未嘗不善法行既久多所比周舊例犯贓連坐舉主今復未聞所以互相倣習略不警憚先所薦揚或其過惡力爲揜覆能人貞士耻媚拙容內而御史外而知府有任九年尚仍厥官賢否溷淆何所激勸哉臣惟昔之銓衡或未精是以先帝改爲保舉今之保舉旣未公伏望皇上復祖宗之故廷議命如舊比

周攀援者御史給事糾劾之三月乙丑上展祭于三陵庚午還京師五倫書成諭禮部月一集議群臣所言事閏四月勅禮部申諭內外毋得私收閹人十三道監察御史陳璞等奏山東湖廣等布政司直隸淮安等府州縣連被水旱人民艱窘或採食野菜樹皮或鬻賣妻妾子女或流移他鄉甚至聚爲盜乞令有司加意賑卹蠲免雜徵停止正賦貪酷不才坐視民患者皆究治之命所司議行五月勅大理寺左少卿張驥賑濟山東濟寧以南至直隸之淮揚雜泛徭役悉與蠲免流移者招撫之所司官吏貪酷害民依法究問大脩南京宮殿及祠廟六月南京大風雨山川壇災命戶部移文山東布政司民逃移者設法招撫饑饉者驗口賑濟會稽縣人趙伯泰自言宋裔奏宋孝宗理宗殯宮在會稽安定郡王墳在諸暨福王墳在山陰者豪民田宅樵牧之臺基垣墉盡見毀斥下監察御史發豪民戍邊命吏部毋以夷人爲御史七月永平真定大名鳳陽開封諸府蝗下所司撲滅賑濟之八月庚申朔日有食之應天山東諸府州縣衛所各奏旱蝗相仍軍民饑殍上惻然謂戶部臣曰天災未有甚若今者朕夙夜惶懼卿等思弭卹之道亟

行之十月監察御史林廷舉言吏部者朝廷所使進退流品考課銓選也近年三司等官及軍民人等槩將方面有司具奏保留至擬陞某官擬改某任夫改任者以為才固不必改也不才則彼民非民歟保留者以為不賢固不必留也果賢曷若多方分惠歟矧其所舉多以逢迎諛悅為卓魯以催科培尅為龔黃撫字心勞目為迂懦剛介不阿斥為戇愚闒茸之吏互相倣習煽惑愚民蒙昧保舉復任之後惟圖私報曷念在公紊亂侵官莫此為甚乞嚴加禁戢下吏部議命滿九年去任者聽保留未及去者不許并下廷

舉所言於中外十一月庚寅皇長子生考郎兀衛都指揮哥哈遣官入奏黑龍江諸部野人欲來朝貢乞付勅招之上曰朕不能勞人以事遠若其自來固不拒也嚴私鹽之禁十二月禁饒州府私造黃紫紅綠青籃白地青花等瓷器皿者首犯凌遲處死籍家資丁男充軍邊衛知不告者連罪坐嚴四川陝西私茶之禁

十三年正月釋李景隆家屬拘繫於南京用祁銓為淮王二月脩大興隆寺禁城西作佛事上臨幸焉

寺初

名慶壽金章宗時所創王振言其朽敝上大役軍民重脩費物料鉅萬既成壯麗甲於京都

甲申

上展祭于三陵三月戊子還京壬寅傳臚進士及第
 第一人彭時不至鴻臚寺卿廷劾時上曰宣索之故
 事廷劾當捕逮廷臣服上敏思任發既誅其子思機
 發潛住孟養使招諭之疑懼不至命兵部尚書靖遠
 伯王驥總督軍務都督同知宮聚佩平蠻將軍印充
 總兵官都督僉事張軌充左副總兵田禮充右副總
 兵方瑛充左參將貴州都指揮同知張銳充右參將
 率南京直隸及雲南湖廣四川貴州官土二軍征勦
 之兵部侍郎侯璉贊其軍四月皇二子見潏生給遼
 庶人貴烺妻子歲祿如故命吏部選進士人物俊秀

貫江北者三十人以聞既得萬安劉瑒王恕等引見

內廷以為庶吉士教讀於翰林遣刑部右侍郎薛希

璉都察院右僉都御史張楷分詣南北直隸鳳陽等

府捕蝗

張楷慈谿人永樂甲辰舉進士歸省遂肆力古文辭宣德間拜監察御史刑部獄繫巨盜

賂椽詐死出復為盜楷劾罷尚書以下十數人理冤

摘姦風振朝宁久之陞陝西按察僉事尋陞副使同

王驥巡邊上安邊十二事多見采用正統十二年驛

名陞僉都御史巡撫畿甸至是被命捕蝗真定奇捕

不力奏械之八郡震竦蝗不為災其後討鄧茂七葉

宗畱有功第其承命撫賊時兵部榜無印文賊疑不

信楷即矯為征南將軍印往招之賊

使銅錢以久旱遣禱于寺觀祠廟諸神以河南山東

旱蝗勅刑部右侍郎丁鉉巡視之命中外學宮元時

所塑孔子像爲左衽者悉改之襄王妃父卒請遣官祭葬又爲郡王郡主請弔賀於其外戚家禮部尚書胡濙請如韓王往南京祭掃祖墳例允所請上責濙祖塋也而何可比外戚不許六月廣西蠻賊殺掠潯州等處賊破電白縣審驗被殺家優卹之大名府淫雨河決滄沒三百餘里壞軍民廬舍二萬區有奇男婦死者千餘人命戶部遣官賑卹除其租稅七月京師飛蝗蔽天巡按河南監察御史冷謙言竊見內外官初任之時莫不砥礪束脩及得授方面知府歲不一二三遂改度操往往累及薦舉大臣誠以厥初希望而後怠窳乞遵洪武永樂舊制一從吏部選擇陞授或皇上親擢任用從之遂罷大臣舉官例亦罷各部郎中員外九載會考之制從本部堂上官及都察院考覈八月福建賊鄧茂七攻掠沙尤二縣命左軍都督府左都督劉聚往勦之上識右僉都御史張楷才命往監其軍得用鼓吹導騎出都門文武大臣祖餞巡撫大同宣府右副都御史羅亨信奏塞卒勞邊歲無寧日餘丁無他生業惟事田作而已今計一歲得盡力南畝者十無八九蓋每歲正塞卒候接北虜使臣二月出境三月始得就田七月又復採草八月以

後脩關備邊十月又將迎接使臣矣邊地砂礮瘠瘠霜早雨遲收穫甚薄聽之自食猶慮不足若徵其稅必致逃竄昔太宗皇帝時詔關邊土者無徵皇上初年亦有是命今大同宣府所有新關戶部遣官經量人除八十畝外餘地每畝徵稅五升臣竊謂爲戶部者但知積粟實邊孰知守邊在人心不固誰與共守乞罷其役上嘉納之九月新城縣疫寧王權薨上諭禮部臣曰聞內外官有事至王府者多方需索致其窘迫自今止許禮待酒饌勿與餘物三司并巡按御史體實來聞犯者悉處死全家發戍邊三司御史知而容隱者重治之十月命巡河官三年更代命刑部右侍郎楊寧往江西大理寺少卿張驥往浙江撫安人民操練軍馬隄備賊寇巡按廣東監察御史楊剛言嶺南被寇多因有司撫字失宜訪得廣東都司經歷司都事鄧敏布政司廣豐庫大使周剛海南縣典史楊傑皆通練有斷乞署敏於化州剛於龍水傑於新會俾展所長庶未僚跂奮罷民蘇醒上曰三縣創殘御史所舉必稱撫綏吏部其母限資格擢用之十一月命寧陽侯陳懋佩征夷將軍印充總兵官保定伯梁瑤充左副總兵平江伯陳豫充右副總兵都

督僉事范雄充左參將董興充右參將刑部尚書金
 濂參贊軍務統率在京及浙江江西官軍征勦福建
 賊鄧茂七廣東山賊趙普旺等率眾為亂劫掠瀧水
 電白二縣

十四年正月瀧水縣徭賊出掠民居丙申月當食不
 食二月湖廣賊蔡妙光攻破龍南縣寧陽侯未至福
 建巡按御史丁瑄率指揮劉福擊鄧茂七于延平斬
 之王驥宮聚張軌田禮方瑛張銳侯璉等攻思機發
 十三寨於金沙江之管屯大破之思機發遁賜勅獎
 諭命驥聚軌禮回京瑛留雲南充右參將銳回貴州

都司璉留雲南贊理軍務勅緬甸宣慰使卜刺浪馬

哈省以速刺管治孟養地方緝捕思機發等以麓川

平告于天地宗廟三月處州賊葉宗留犯江西廣信

境永豐知縣鄧顯死之予贈諡顯廣東樂昌人時賊

張楷檄顯禦之顯伏兵截殺賊眾大至顯力戰不敵

或勸顯走顯曰人臣死忠遂為所執不屈罵賊死事

聞贈光祿寺少卿諡忠毅 庚寅上展祭于三陵癸巳還京反賊蔡

妙光平招撫葉宗留賊黨福建強賊流劫江西贛州

府境攻破瑞金劫廣昌石城處州賊陳鑑胡破松陽

龍泉二縣湖貴苗賊攻破靖州五開銅鼓各衛屯堡

及綏寧會同等縣四月處州賊陳鑑胡劫掠崇安等

縣殺指揮吳剛等命靖遠伯王驥旋師沿途相機勦
 殺湖貴苗賊遂昌賊首蘇牙俞伯通等攻蘭谿縣金
 華知府石瑁等集官軍民壯擒斬之命崇信伯費釗
 刑部右侍郎薛希璉鎮守福建新寧伯譚璟大理寺
 右少卿張驥鎮守浙江劉聚張楷擒鄧茂七餘黨於
 南平順昌甌寧三縣招撫三縣民復業命大理寺左
 寺丞李奎巡撫河南及直隸真定等四府吏部右侍
 郎趙新巡撫山東及直隸鳳陽等四府以賑失業之
 民賊陳鑑胡劫義烏武義東陽等縣貴州苗作亂以
 久不雨遣告于天地百神福建海賊陳萬寧攻破廣

東潮陽縣五月以建昌府推官黎忠為本府知府

時寇猖獗建昌密邇近地民亦嘯聚忠多方撫捕貴州
未幾知府員缺屬民千餘保忠才能故有是命

鎮遠府四川播州所屬苗獠俱作亂麗水縣丞丁寧
 率領老人王世昌等誘賊首陳鑑胡等出追還所
 掠人口即陞處州府同知世昌等授巡簡一官命薛
 希璉張驥訪察貪污官吏逮送京師命大臣考察中
 外官吏著錦衣衛馳命福建撫按等官會同案問賊
 所以起與有職事於其土者悉械送京師并撫捕實
 狀以聞義烏縣民壯胡彥陞等生擒賊首偽大王蘇
 記養尋授副巡簡六月靖州等處苗賊流劫辰溪縣

等處甌寧縣賊首林拾得聚衆拒敵官軍殺右參將張瑛等丙辰南京風雨雷震謹身等殿災勅諭兩京文武群臣脩職遂下詔大赦天下湖廣生熟苗蠻蜂起命靖遠伯王驥調師十萬滅之命太保成國公朱勇選精銳馬步官軍四萬五千人令平鄉伯陳懷駙馬都尉井源都督耿義毛福壽高禮太監林壽率三萬訓練於大同都督王貴吳克勤率萬五千訓練於宣府以備虜七月遂昌縣民鄭仕本楊實寧擒獲賊首華宗演等命爲副巡簡虜大入寇有聲息命邊將謹備之苗賊劫掠武岡州及黔陽縣處州知府張佑統領民快王應參金禮率衆殺賊一千餘徒生擒首從八十餘人授應參禮巡簡巳丑虜酋分道入寇上議親征焉吏部尚書王直率廷臣諫司禮太監王振從中勸成上不聽命郟王祁鈺居守駙馬都尉焦敬輔之太師英國公張輔太保成國公朱勇鎮遠侯顧興祖泰寧侯陳瀛恭順侯吳克忠駙馬都尉井源石璟廣寧伯劉安平鄉伯陳懷襄城伯李珍遂安伯陳垣脩武伯沈榮建平伯高遠永順伯薛綬忠勇伯蔣信左都督梁成王貴右都督李忠都督同知王敬都督僉事陳友安朵兒只戶部尚書王佐兵部尚書鄺

楚吏部左侍郎兼翰林院學士曹鼐學士張養刑部
右侍郎丁鉉工部右侍郎王永和都察院右副都御
史鄧榮通政使司右通政龔全安左參議欒暉太常
寺少卿黃養正戴慶祖王居一大理寺右寺丞蕭維
禎太僕寺少卿劉容鴻臚寺掌寺事禮部左侍郎楊
善左寺丞張翔尚寶司少卿凌壽翰林學士張益及
諸給事中監察御史等官俱扈從大同總督軍務西
寧侯宋瑛總兵官武進伯朱冕左參將都督石亨等
拒虜大同已敗瑛冕死之甲午車駕發京師夕次康
家嶺乙未次龍虎臺夜驚丁酉過居庸關風雨連朝
六軍患苦文武將士皆無紀律群臣請駐蹕不許戊
戌次榆林站己亥次懷來庚子次雷家站辛丑駕至
宣府風雨大至邊報益急扈從群臣復交章請駐蹕
王振怒俱令略陳壬寅次雞鳴山衆皆危懼上素以
事付振振益肆威拒言折辱諸大臣必進師我師漸
進虜漸退伏塞外癸卯次萬全峪是夕金星犯亢甲
辰次懷安是夜黑雲四塞乙巳次天城西丙午次陽
和是夕火星犯土星丁未次聚落驛八月戊申朔次
大同己酉雨益驟始議旋師庚戌東還其夕營於雙
寨有黑雲覆營如蓋須臾大雷電風雨徹夜驚亂辛

次滴水壬子次洪州方城癸丑次白登月犯心宿
甲寅次懷安城西乙卯次萬全峪丙辰次陽和北沙
嶺丁巳次宣府庚申將發宣府諜報虜襲我軍後遂
駐蹕恭順侯克忠殿戰敗沒遣成國公勇永順伯綬
領軍往揀遇伏雞兒嶺亦陷辛酉次土木絕水虜益
至壬戌詐退王振使移營近水陣動虜四面至我軍
大潰上陷虜中虜邀車駕北行唯中官喜寧忠勇伯
蔣信從振等皆死士卒死者數十萬張輔陳瀛井源
井源邢臺人尚嘉興大長主其率追封鉅鹿侯諡榮愍 陳懷李珍沈榮梁成王
貴王佐鄭埜曹鼎丁鉉王永和鄧榮張益龔全安黃

養正戴慶祖王居一劉容凌壽及給事中包良佐姚
銑鮑輝中書舍人俞拱潘澄錢曷監察御史張洪黃
裳魏貞夏誠申祐尹竑章存德孫慶林祥鳳郎中齊
旺馮學明滕員員 寧人員外郎王健程思溫程式遠端
主事俞鑑張瑋鄭瑄大理寺左寺副馬豫行人司正
尹昌行人羅如墉欽天監夏官正劉信序班李恭石
玉等皆死焉 王作海豐人宣德初為戶部右侍郎往陝西經理糧儲疏言軍衛倉弊百端請
改隸有司天下稱便已鎮守河南民安盜息未幾召
回提督京倉久之命理部事進尚書為人寬厚坦夷
不沽名伐技勤於學問在官節省調劑雖無赫赫名
而政未嘗不舉景泰初贈少保官其子道諡忠簡
鄭埜字孟質宜章人永樂九年進士為兵部侍郎言
天下軍總小旗子弟代襲必試弓馬然例皆赴都督

名山藏 卷之二十一 典謨記

府今後請各試於都指揮使司為便上親征楚首言
 不可數請命將代行皆不報次雞鳴山宣府虜報漸
 進振以楚與王佐留師為振所叱退楚為人謹畏而性
 尚節儉居官四十年終始無日不以職務為念而求
 所以稱使者惟恐或後於人贈少保諡忠肅曹鼎
 字德恒一字萬鍾寧晉人宣德丁未中乙榜授學官
 不就願自效劇職銓曹街之改太和典史時中使旁
 午郵無虛日鼎處應綽裕暇即延禮師儒講明性理
 歲壬子督部工匠赴闕疏乞再入會試中第二人揚
 士奇一見奇之廷試宣帝策以義禹河洛象數鼎對
 稱旨上親擢第一鼎居常篤行事繼母至孝有鄰婦
 欲挑之鼎心念曹鼎不可及廷試之日忽有曹鼎不
 可四字從空飛至授官翰林修撰英廟初楊溥薦入
 經筵為講讀官累進吏部左侍郎仍兼學士入閣疏
 後爽識達政體被英廟眷注士奇沒後大事皆決
 於鼎其才亦大類士奇十四年死士木贈榮祿大夫
 少傅吏部尚書文淵閣大學士諡文襄英宗復辟加
 贈太傅諡文忠官一孫錦衣百戶丁鉉字用濟豐
 城人以進士任太常博士正統三年為刑部侍郎

貌潔白恂恂寡言退然若無能及任事綽有餘地嘗
 承命賑饑江淮暨山東河南撫循勞來出於至誠大
 發倉庫悉停不給民氣勃然王永和字用節崑山
 人父有疾伏枕十八年永和奉父無懈以明經舉永
 樂甲午鄉貢乞就教職以便養母吏部尚書蹇義器
 之奏為兵科給事中以都給事中擢工部右侍郎往
 巡視淮南諸郡訪求利病致便宜於民比還特命掌
 部事河決山東河南諸郡改而北注漕河被其潰溢
 永和受命往治濬泄有方比還以能事簡預扈從妻
 陸有賢行聞當永和行驚悸欲絕聞變哀痛成病死
 鄧榮字孟擴南城人永樂中進士授御史按蘇松
 諸郡用寬平治歲餘當代父老乞留二千餘人遂許
 留一年以父母喪歸起清軍福建薦陞陝西按察使
 居陝十年不攜家人子弟歲滿將詣京師吏民父老
 涕泣攀贈既至超遷右副都御史數月從征虜英宗
 蒙塵從者請榮脫去榮叱之曰鑾輿不返何面目見
 人逐虜深入死之贈資善大夫右都御史諡襄敏子
 瑞大理寺右評事痛不得父遺體以所収平日瓜髮
 并字跡受以衣冠斂而葬之張益吳人七歲而孤
 母倪通孝經女史日自課督諭以哀苦即知激勵永

樂乙未年十九舉進士選庶吉士以善楷書改中書舍人正統中為侍讀學士聞母節於朝詔書旌門復家益欣然遂志乞休終養不許至是以學士從駕沒益初同夏仲昭同時登第兩人竝從陳嗣初王孟端游作文寫竹而益文章圓熟有名於時性喜奕與人奕無日夜求益文者逼之則命書童預界卷軸舉筆一揮詞翰俱美其後仲昭見益文佳為之輟筆既益以仲昭寫竹愈已亦不復畫兩人竟用所長名世孫琮官至右都御史初琮為御史時印馬道士木設祭焉是夜夢益衣冠如平生曰予我紅沙馬明日忽報後隊紅沙馬死歸訪其父從駕時騎紅沙馬云天順年諡文僖申佑貴州人為諸生讀書思州府畏糧徒步常從其父之田父忽虎銜去佑挺身持杖奮擊之虎逸父免至焉正統中以舉人詣業國學祭酒李時勉被枷國學門佑與石大用抗疏尋登進士為御史談論風生會出按南畿所至與諸生講論經史至安慶諸生相謂曰御史貴州人千字文秀才也佑上微聞之次日試題起剪頗牧用軍最精諸生大沮上之陷虜中也南面坐地一虜來稅上衣上不受虜怒

欲兵上一虜詰之熟視曰此非常人與見賽刊王上見賽刊王曰子也先乎子伯顏帖木兒乎子賽刊王乎子大同王乎伯顏帖木兒賽刊王大同王皆也先諸弟也賽刊王驚馳告也先曰今得一人問我那顏名字問我等名姓寧大明皇帝耶那顏華言君也主也也先曰安在名熟使使視之使至上亟呼其名虜使大驚下叩首還語也先果大明皇帝也也先聚其酋長而謀曰大元皇帝一統天下我等日夜扣天求取故物天果與大明皇帝若何處之有一酋長名乃公者曰大明皇帝我大元皇帝仇也天賜那顏其可

違乎伯顏帖木兒怒搏乃公頰曰那顏圖作萬世後好男子大明皇帝天人也不知天帝何故有怒焉推而棄之地下雖然兩軍交戰不億人馬有中刀者有中箭者有踐傷死者有壓死者大明皇帝獨不中刀不中箭不及踐傷不及壓見而問那顏問我等無驚恐怨怒我等久受大明皇帝厚賞賜雖天有怒推而棄之地下而未嘗死之我等何可反天那顏若遣使告明人使明人來迎而返之復爲天子萬世而下那顏不畱好男子名耶皆曰得知院言是也也先顧伯顏帖木兒曰汝卽領活大明皇帝遂以我先所使千

戶梁貴見使虜一人偕報明虜中所嗜九龍蟒龍段匹上使貴取之并取珍珠金銀以賜也先時梁貴以袁彬見遂得侍上當是時也京師戒嚴羸馬疲卒不滿十萬人心洶洶羣臣聚哭于朝議戰議守未有所決侍講徐瑛曉天文好談兵倡南遷禮部尚書胡濙曰文皇帝定鼎于此示子孫不拔也而尚可遷刑部侍郎江淵曰當固守兵部侍郎于謙曰言遷者可斬也速名勤王兵死守之學士陳循曰于侍郎言是衆皆是皇太后禁中疑懼問太監李永昌永昌對曰是也陵廟宮闕在此倉廩府庫百官萬姓在此南遷大

事去矣且陛下不聞宋靖康乎因爲皇太后述靖康事皇太后悟甲子也先奉車駕宣府城南守宣府者昌平侯洪先避去上命諸將開門登陴遙對曰天暮矣所守者陛下城池也上涉河北是夕虜有他志天大雷雨震死也先所乘馬虜衆皆驚袁彬出窺赤光覆幄虜大駭異旦也先頓首幄前進熟餽皮服寢具有岳謙者故通事也上復使從故太監喜寧於京師取金銀絲幣賜虜乙丑皇太后命郕王祁鈺攝總百官戊辰虜二千餘人奉車駕大同城下守大同者定襄伯登亦閉門不內上曰傳語郭登與朕姻婭何得便爾袁彬持駕牌觸門而呼大同人縋之廣寧伯劉安給事中孫祥知府霍瑄出見上曰勿疑汝主也安等伏哭上前上使入登亦出見伏哭上曰奏報皇太后朕虜中亡恙也先欲送朕還使來厚賞之遲之益深入矣因取庫金二萬二千兩以二千賜也先五千賜伯顏帖木兒若賽刑大同王餘以與虜衆虜益邀賞武進伯朱冕內官郭敬括家貲并諸指揮千百戶家出衣服分犒之置酒大勞上召定襄伯固守刈秋稼飽士慎警報是夕虜奉上駐蹕城西二十里定襄伯欲使壯士輦上過石佛寺乘間迎入城上曰我

命在天勿取敗道是時郕王以于謙為兵部尚書庚午王御午門諸大臣廷啓王振罪王曰待取旨百官趨進伏地不起曰王振罪不容誅殿下不即正典刑族滅之臣等今日皆死此廷中痛哭呼號不辨人聲郕長史儀銘膝行前錦衣衛指揮馬順叱退之給事中王竑起直前粹順髮嚙其肉曰爾昔倚王振奸橫今尚敢爾群起擊之或就脫順鞞擊出順眼灑血於廷順遂死朝班大亂守衛之士皆哭王環視屢起于謙掖止之王竟入將闔門百官隨之太監金英傳令且退衆欲粹英英懼即傳令曰許籍沒王振家矣尚

何言百官曰猶有毛貴王長隨亦振黨請付外王令出二人門隙中又捶死之頃之衆執振姪指揮山至相戒勿捶使伏法與天下共知之王遂命縛山赴都市坐凌遲之誅下諭曰闈寺顯權國家多難已如百官請其各出蒞事皆拜退曳棄三屍東安門外道上軍民爭擊之衛士提水來滌血廷中儀銘曰母其影可以鑑是日也進都督楊洪為昌平伯辛未陞石亨為武清侯充總兵官練兵京師是日虜奉車駕至威寧海子壬申廷臣交劾隨駕失機總兵官鎮遠侯顧興祖等王下興祖獄禁錮之是日虜奉車駕次九十

九箇海子癸酉次柳原甲戌次黑河劉安述出見太
 上皇語於朝王諭安曰聞虜圍擁一人稱是至尊爾
 等出朝與之貨物不慮誘耶楊洪益遠避之爾何無
 謀中國惟知社稷為重總督獨石等處備禦右少監
 陳公言虜中阿刺知院率眾圍龍門射矢繫書言講
 和下兵部尚書于謙曰虜詐但防兵丙子群臣合請
 皇太后國有長君社稷之福宜立郕王為皇帝是日
 虜奉車駕次八寶山九月癸未郕王即位遙尊上為
 太上皇立太上皇子見深為皇太子以明年為景泰
 元年詔赦天下監察御史李著上疏爭疏曰啓稱帝

曰殿下自稱曰下官帝曰御史醉耶著對曰下官正

言帝誅之著郕人以監生授廣西道監察御史既伏

誅英朝復辟令禮葬之癸巳虜奉車駕斷頭山虜故得

柩不可遷禮葬命下賞賜厚有德中國之心其送上皇也第欲得漢物無

得諭祭乃可遷云他意中國慮虜黠不敢信既扣諸關無所入乃奉車

駕以北上皇在虜中無阻怯之容隱處幄居時時見

徵表也先繇此奉上皇甚恭而我雖不納虜眾往來

遣使亦不絕也乙巳遣都指揮季鐸起居太上皇告

即位及立皇子王奉太上皇書虜若送駕來可五七

騎擁眾大入則不敢許大兄還居天位無所不可但

恐降尊就卑他日非所以正名亦致書於也先也先
曰明立皇帝矣終無和意復往追擾令彼南遷取我
故元大都不亦善乎庚戌殺馬設宴共立太上皇爲
皇帝以白馬賀壬子復送車駕還京十一月甲寅至
大同東門也先遣伯顏帖木兒及喜寧岳謙言於城
下曰不納上皇者久久必讎殺霍瑄出水竇以見控
御馬獻鶩酒諸物上皇密諭瑄告郭登毋開門也轉
至陽和陽和不敢納喜寧語虜曰二邊不納今可從
紫荊關進腹裏以入京師遂奉車駕入關殺關指揮
韓清等副都御史孫祥守關出走死時京師戒嚴命
諸將分陳九門受石亨節制于謙督亨軍丁巳虜奉
上皇過易次良鄉父老獻茶菓羊酒戊午次盧溝果
園署官獻果品上皇奉太后與帝諭群臣凡三書書
命固守頃之遣岳謙與虜使納哈出荅話彰武門外
守門官軍擊殺謙納哈出奔還也先遂列陣西直門
外上皇御幄止德安門外巳未虜奉上皇土城邀大
臣迎帝疑焉卽日陞通政司右參議王復爲右通政
中書舍人趙榮爲太常寺少卿齎勅出見進羊酒諸
物也先伯顏帖木兒探甲冑屬弓矢取勅視蕃書太
上皇帶刀取勅視漢書上皇曰大臣何不來也先問

曰是皆何官上皇曰小臣也也先曰大臣不迎而使小臣我送皇帝到門乃諸大臣不迎皇帝上皇曰爾歸則使于謙石亨王直胡濙來復榮及命下廷議言謙等國所仗竟不遣庚申謙亨伏兵德勝門兩旁擊虜敗之都督孫鏜戰西直門斬虜先鋒數人逐之虜益圍鏜力戰都督高禮中流矢亨分兵往虜引却都督王義武與戰彰義門外以神銃擊却虜遂敗之逐至土城興中流矢死居民升屋擲虜磚亂下也先怒壬戌奉車駕出土城北去與伯顏帖木兒大同王謀送太上皇出紫荆自往攻居庸居庸不守卽迎太上皇還入京師而曰中朝大臣無一人出迎駕但隨皇帝者皆歸於是獨袁彬與通事哈銘隨太上皇駕癸亥也先先行駕後失所向袁彬大哭家有老母而不得歸哈銘曰兄切勿言萬歲金身然且在此我等草木沙土也又何足道太上皇使銘籠馬左右行過溝河山崖銘下馬扶持甲子伯顏帖木兒大同王來護太上皇道見曰太師誠心送皇帝歸皇帝家兄弟立爲皇帝皇帝臣宰背皇帝恩不一出見太師所以怒而西還今欲到陽和使使臣送皇帝從居庸關以歸毋令皇帝望見京師思念皇太后萬一皇帝念

太后病悸至有不可知乃使我留惡名後世晚至易
卒劉婆兒取水作飯銘煮肉納皮袋防太上皇道饑
乙丑過紫荆銘請過視其親太上皇曰如何捨我銘
曰銘死不敢他丙寅次蔚丁卯次順聖川己巳至陽
和是時也先已攻居庸不下喜寧曰太師云於此送
駕矣忠勇伯把台曰太師又謂於此送駕是輕也意
欲奉太上皇至其營還求中朝使臣來迎乃成禮耳
把台者將信也與喜寧故皆虜中人故能得虜意然
信多所擁護而喜寧好生事時時為虜畫計亦數桀
驁上皇前上皇無以罪也庚午虜奉車駕出陽和西
行雪太上皇帳寢雪中辛未次貓兒莊壬申往卽寧
海子東岸行甲戌至虜營哈密為帳有虜一人欲殺
銘竟已乙亥往西北行曰小黃河東伯顏帖木兒小
營在焉伯顏帖木兒妻急使虜女設氊帳止宿供具
數日復西行是月也致書也先曰太師送太上皇還
京具悉厚意聞軍馬從西剽衆心驚疑以此整棚隄
備太師若退劄山下解甲置兵送駕中途人有額數
此亦當解甲置兵迎駕人如太師之人抑太師之人
有厚賚焉以虜退進封石亨武清侯于謙少保兼兵
部尚書十一月上皇至虜營虜奉益恭殺馬設宴稽

首行君臣禮妻妾四人次第上壽伯顏帖木兒亦與其妻見上皇如也先禮也先七日一獻馬伯顏帖木兒七日一獻牛日一獻羊馬牛潼射生則獻野馬黃牛上皇道行或乘馬或坐暖車虜男女途見皆馬上叩頭時或進生也先時時設宴手上酒手彈箎撥思兒唱曲虜齊和之大同賽刑二王上酒皆跽曰中國聖人天之姤也也先請上皇曰今得明遣使來迎皇帝歸矣上皇曰卽汝自送我求我使臣徒費往反耳喜寧不悅謂忠勇伯曰求急歸者袁彬也合殺之上皇乃謂喜寧我自謂也居數日也先奉上皇轉西行至八寶山喜寧復言從此還到甘使其守將迎入卽轉入陝西取陝騎卒以入南京遂居於南京彬銘候喜寧去白上皇曰天寒甚陛下又不能騎空取凍冷到時守將亦必不受上皇曰是也喜寧曰此又哈銘謀直殺銘耳上皇道渴銘覓陽泉鑿冰進水上皇居哈銘求虜車一輛駱駝一隻展猫皮褥坐上皇車中伯顏帖木兒所畜虜奴竊上皇物喜寧聞上皇使銘往索之銘曰我今在困中索虜竊取物如虎口奪食徒生怨耳上怒使袁彬鞭銘鞭已就叩頭羶帳前上皇曰鞭何叩頭也銘曰臣棄父母兄弟妻子而從陛

下尚誰攀耶是月也也先遣使來求使臣不見報因
自來掠寧夏竟歸歸則請尚妹上皇固郤之上皇處
居益莊虜大服聖敬云是月以甲申詔天下詔書言
虜駕辭講和迎請太上天臣出見徧歷虜營失駕所
在乃焚書斬使擣之六軍斬獲甚盛京城內外人心
帖然用告天下以彰殺伐之威太常寺少卿習嘉言
孝弟慈愛人道所先推以化成天下虞氏之爲政也
太上未還皇太后宮中豈能紓樹諶之憂割懸旌之
心願陛下朝夕惓惓口不釋迎復語皇太子幼冲不
時存問孝弟慈愛昭著內外自然天下之人有所感

動以濟大功十二月庚戌尊皇太后爲上聖皇太后
母賢妃吳氏爲皇太后封妃汪氏爲皇后雲南金齒
軍民指揮使司知事袁敏言太上皇帝曩居九重之
上所服袞繡所食珍羞所居琉璃之宮芙蓉之闕今
遠處沙漠日之窮次歲且更始凡有人心孰不思痛
臣聞主辱臣死上皇辱至是爲人臣子鼂夕思念碎
骨剗心乞遣人起居將奉禦寒衣具若飲食之物或
就令臣同通事人伴齎往臣雖死虜亦所甘心是歲
湖廣貴州苗賊作亂廣東強賊黃蕭養廣西猺賊肆
掠電白縣焚縣治殺官妻女命靖遠伯王驥佩平蠻

將軍印克總兵官勦殺貴州等處苗賊後軍都督同知董興充左副總兵調遣江西兩廣官軍往勦廣東叛賊

名山藏卷之十三

臣等喬遠恭輯

典謨記

景皇帝

景皇帝景泰元年正月太上皇在迤北燒表告天地也先設羊酒斷頭山奉宴也先妻及酋衆進皮條爲賀是月福安縣賊首陳嚴四等作亂沙尤二縣鄧茂七餘黨羅應廖寧等復叛殺尤溪縣主簿突入清流殺掠閏正月韓王範坤薨大同總兵官右都督郭登敗虜栲栳山封定襄伯初喜寧引虜破紫荆關虜欲

典謨記

以輕騎送上皇喜沮虜者再至是登獲虜諜言誘擾邊者出喜寧二月上皇居東勝州也先使那哈來朝上語也先使喜寧及高旺與之俱既行上皇使袁彬哈銘送微雨上皇曰此洗屍雨也喜寧不反矣高旺至邊亦言喜寧於邊人及野狐嶺右參將楊俊令邊人為喜寧置酒將食縛之歸京師磔之市三日報至上皇亦喜曰我故言洗屍雨是月也命石亨佩鎮朔大將軍印充總兵官巡哨大同都指揮楊能充遊擊將軍巡哨宣府太上皇第四子見淳生三月也先聞喜寧誅與賽刊王議領部屬異道入寇必送上皇遂分圍萬全寧夏慶陽天城鴈門大同等處皆不得利四月上皇歎曰曷月予歸哉歸當居於逍遙之府哈銘泣曰陛下非有畋遊荒亡之樂為天下蒼生而來歸當正位又何歎也既數日上皇居豐州伯顏帖木兒妻使使女問銘等曰今已夏煖何得炙薪皆言不也我輩數人同一氊帳何地炙薪使女曰我謂薪焰也氊帳上乃有火光歸語伯顏帖木兒妻妻以告伯顏帖木兒皇帝帳上夜現光必有大福伯顏帖木兒放鷹得一野鷄與酒來獻謂哈銘曰我今有一喻上奏皇帝如大海潮時有一大魚落在水灘是大海魚

龍淺水佳潮來終去皇帝莫急是月監察御史許仕
達言自冬徂春災異數見黑氣四塞烈風拔木時雨
久缺臣考之經傳驗之人事天降災異莫不有繇臣
以爲天心仁愛欲陛下盡絕宴安酖毒之私奮發臥
薪嘗膽之志以成非常之功以雪非常之恥陛下宜
痛自修省日與輔臣講求治理耳目之娛荒寧之事
不使喪於心志居起服食凡百自奉亦宜抑損不令
過奢申戒群臣同加修省視雩南郊禱於皇天后土
如成湯申桑林之責高宗用祖乙之言庶可上副天
心下消災異帝曰善勅保定伯梁瑤佩平蠻將軍印

充總兵官與都督毛福壽方瑛勦殺貴州苗賊名王
驥還京廣西羅城賊首韋萬保攻融縣柳城賊首侯
公寒攻破古免高界等寨復攻藤縣殺指揮潘濟麗
水縣賊首朱必森復聚衆行劫殺縣丞一人縣丞葉
仁集民夫破之五月虜分道入犯河曲縣復犯義井
屯堡盡殺其守卒及指揮僉事劉受復圍代州寇宣
府已虜酋阿刺知院以虜主脫脫不花之命來遣其
參政完者脫歡貢馬請和至懷來使太常寺少卿許
彬錦衣衛指揮同知馬政往察其情僞完者脫歡言
講和退兵卽奉上皇還不且率衆大舉若見疑請以

為質帝問戶部尚書兼翰林學士陳循曰虜可和耶
循曰遣而備之是月旱不雨廣東賊黃蕭養攻廣州
府數月左副總兵都督董興等敗之蕭養中流矢死
函首京師梟于市六月太子太保兼吏部尚書王直
率諸大臣言上下神祇陰誘虜衷使來請和臣等切
惟陛下大寶嗣登天與人輸永永無二陛下隆敬兄
之心尊為太上昭告天地宗廟社稷名位已定天下
之人皆以為宜令車駕還虜中太上尊居不復事天
臨民陛下但盡崇奉之禮即稱天倫之厚伏望俯從
虜請遣使答之如果至誠即別令大臣迎駕帝曰當

時大位卿等歸我非出朕心大兄蒙塵朕累使往虜
不聽從無如許何于謙從旁對曰陛下大位已定誰
復異議答使盡禮紓虜難也帝曰從汝從汝既出帝
使人追問曰即使虜誰可者孰為富弼文天祥王直
對曰孰非廷臣孰敢不應丙戌也先帖木兒奉太上
皇至大同城下郭登開門以迎朝服立于闥伏人城
上約駕入下懸闥及門虜覺復擁上皇去遂轉犯懷
來戊子月食七月以禮科給事中李實為禮部左侍
郎羅綺為少卿馬顯為指揮使偕完者脫歡往以報
請和之議帝遺可汗及也先書不言及迎上皇事項

之虜主脫脫不花使復至求與廷臣同往王直等以請帝曰李實方行已命都察院右都御史楊善工部右侍郎趙榮為正使都指揮同知王恩正千戶湯胤績為副使與使同往禮部尚書胡濙等請量齎服食御用太上所需不報實至朝上皇上皇皮帳布幃席地而寢獨袁彬等三人侍傍牛車一輛馬一匹以備徙營上曰為天下生靈躬率六軍不意被陳友王振等所陷念非樂酒從獸以至於此也先送我固其誠意喜寧導行引破紫荊關再圖京城以此不得還歸後嘗一到小黃河一到乾河又復阻也先送我振寧死矣陳友罪不可赦也因問聖母今上安否問舊臣一一道其名姓上曰我居虜一歲矣何故不來迎歸我衣服冠帶帽靴將得來否實對曰陛下蒙塵天下臣民如喪考妣從虜中還者有言見陛下有言不見虛實難知遣臣來探故不將得上曰汝言當今皇帝及文武羣臣遣人迎我還守祖宗陵寢也可為百姓也可也先言不迎我擾邊十年亦不甘休我不足惜須念祖宗社稷生靈實奏臣誠悲痛陛下昔日錦衣玉食今至惡陋輒有白粲數升欲進厨下上曰此小節爾朕念歸也實曰當日王振一宦官耳陛下何故

寵之太過以至今日上曰我亦知之無事時人皆不言今乃罪我我悔何及實退將行復朝辭請返國之日引咎避位上皇嘉之日暮上皇情色凄然實與虜使還朝具述虜情及上皇起居狀諸文武大臣合上疏曰臣等共詢李實言出塞道中行群虜聞欲議和皆舉手加額及見也先殊喜言迎使夕來大駕朝發天日在上決非妄言引見上皇亦謂虜信上皇凄切不忍之情實又具道臣等切詳虜人悔過請和實天地宗社之福宜仍遣實詣虜迎復上曰虜詐楊善已去第以迎復之意書勅付虜使還文武大臣言虜非詐也臣等詢李實詳矣虜使來和尚遣使答今請迎復乃不與偕是輕迎駕重講和也虜之復疑和且不終不迎駕歸何以和為帝令再議李實言也先約臣迎駕毋出八月五日臣言須得朝旨不敢擅為期也先言此期決不可失遂令酋長偕羅綺往大同一帶調回擾邊人馬臣還過宣府懷來見軍民始敢出郊芻牧誠非空言臣曩將命止為講和迎復日期實出也先伏望陛下俯從群請即遣材智大臣往脫虜有詐亦可塞之若過所期更欲使臣亦不敢往帝命再議及虜使還竟付迎復於勅書而已文武大臣復言

事會不再機不可緩願陛下體上皇之心順臣民之情不然虜人指此為兵端矣乃命擇人以聞群臣皆言實方從虜來得其要領即實可再帝竟不遣曰待楊善歸監察御史畢鑾等復言群臣之請切矣陛下必待善歸夫中國所恃者信義也不迎不義失詞不信就令虜詐我備在也不報翰林院簡討邢讓復以為言帝曰上皇朕兄豈有不迎虜情叵測正欲探之情誠而迎又何暮焉八月楊善至虜中也先曰大臣來矣不可無信引見善於上皇所與伯顏帖木兒殺馬牛為酒送上皇行也先彈琵琶妻妾奉飲居數日

築土臺奉上皇臺端率妻妾會長膜拜獻鞍馬貂銀

二鼠皮襖弓若箭賽刊王亦打野盤進酒上皇行也先與酋長送車駕可半日許下馬叩頭解弓箭撒袋戰裙以進諸酋長羅拜伏哭而去伯顏帖木兒獨送上皇至野狐嶺進酒帳房既畢屏人語使哈銘上奏天使皇帝來我遐荒我也先順天之意敬事皇帝一年矣皇帝此來為天下也為邊城也歸時還當作皇帝作皇帝即我主人作音有緩急我可得告愬眾虜皆道傍送駕進羊馬善口呼皇帝行矣伯顏帖木兒再送駕出野狐嶺口上皇攬轡慰藉而與之別伯

顏帖木兒大哭歸而放圍得獐復使數十騎來追獻帝以太上皇且至勅禮部具迎復儀注兵部總戎具防變方略先是累奏不得旨至是群情欣慙朝下多官集議都御史王文厲聲曰來耶來耶虜不索金帛必索土地便謂上皇來邪皆相顧莫敢言于謙曰防變方略謙之職也胡濙上儀注宜令遣本部堂上官一員至龍虎臺錦衣衛遣堂上官一員并官較執丹陛駕輦至居庸關各衙門分官迎接土城外太上皇入安定門東上北門坐皇帝見畢文武百官朝太上皇自東上南門入南城大內帝曰迎居庸用轎一馬

二丹陛駕第迎安定門內戶科給事中劉福等言禮

太薄帝曰朕之卽位非得已也尊稱太上何云薄耶禮部會議之胡濙言福無他意大抵欲皇上篤厚尊親帝曰太上皇自虜中寄言迎禮從簡朕敢違也朝退諸大臣得一亡名書聚觀之書上修史先生隱其名言都人一聞駕旋人人喜躍近之不厭遠望可知今日宜請主上厚奉迎之禮避位婉辭然後受命因述唐肅宗故事諸臣曰若封進或可感動上心胡濙以謂諸同官王直曰可禮失而求諸野王文曰不可匿名文書不得以告禮科給事中于泰以聞帝詰濙

何從得書湊言臣得之高毅帝怒命按捕其人高毅云臣得之隸隸云臣拾之道王文曰勿累小子喫牢飯也千戶龔遂榮出承曰臣爲之胡湊因奏考之唐史天寶之亂玄宗幸蜀肅宗卽位靈武尊玄宗爲太上皇帝肅宗收復兩京迎還上皇至咸陽備法駕望賢樓上皇在宮南樓肅宗著紫袍望樓下馬趨進拜舞樓下上皇降樓撫肅宗兩泣辭黃袍自爲肅宗著之肅宗伏地頓首固辭上皇曰天下人心皆歸於汝使朕得保養餘齡汝之孝也肅宗乃受此已行之令典政可効之良規今備法駕安定門內誠爲太簡帝曰慮墮虜詐故簡其禮但大兄入城朕知尊親朕今迎太上皇東安門內行叩頭禮畢領群臣隨至南城內便殿太上皇升座朕行禮畢文武百官皆朝毋再紛更癸未太上皇至宣府下詔曰朕之不明蔽於權奸被畱虜廷聖母賢弟數遣迎取以天地之恩祖宗之佑幸得還京爾文武群臣請重迎接之禮朕辱國喪師其何顏復見是時禮部復請帝迎駕安定門外文武衙門分官詣龍虎臺百官萬姓迎接土城外會太上皇詔至帝曰太上皇命簡朕事已定乙酉太上皇至雙泉賜袁彬以所御白綾衣及也先所獻戰裙

賜哈銘衽褥靴望日丙戌車駕還京至東安門送駕
虜揭簾審視叩頭退帝迎東安門內駕入南宮文武
百官行見禮庚寅以太上還京祭告天地社稷山川
之神遂頒詔赦天下陞楊善爲左都御史仍掌鴻臚
寺事王恩等賞有差宴虜使九月封朱謙爲撫寧伯
十月祀故翰林侍講劉球於鄉賜祠忠節十二月己
酉月食禮部請以正旦群臣朝太上皇於延安門詔
罷

二年正月梁瑤擊苗賊於靖州大有斬獲二月南京
雷雨擊損大報恩寺塔三月罷遣使入虜四月貴州

賊首韋同烈僞稱苗王聚興平之三截洞攻平越清

平衛梁瑤方瑛等會擊大敗之五月虜使來欲求使
荅諸大臣請許之以怒其心帝曰祖宗開創以來醜
虜遠遁不敢窺伺正爲絕其來往也小人通使語言
不一坐生釁端朕甚恨之今其切已群臣復言虜情
至黠我備未修人情求不得則慚再則憤求而不得
虜無憤耶帝曰虜之狗竊未嘗忘心去年入寇京師
豈因不遣使臣國家久安計不在此太子太保兼吏
部尚書王直言比見聖諭絕虜講和臣知陛下有爲
之君也如是則當有以備之帝曰天下雖安猶備不

虞况今日耶有智勇謀略當舉用者總督總兵具名以聞亡論戎伍太子太保兼戶部尚書金濂言我備未也虜慚而憤孰道其釁昔漢高帝自將三十餘萬衆往擊冒頓而有平城之圍矧今人民邊儲凋弊耗損伏望念祖宗創業之艱憫遠近生靈之苦俯就所請荅其來意帝曰朕志已定所引平城之事恐非臣下所以願國家者太子太保禮部尚書胡濙等言續出瓦刺番文一通令臣詳議觀其語意專在求使臣謂虜情雖謫未保其終然始則奉送上皇今又還我制使使人絡繹駝馬迭貢歸誠悔過亦不可誣夫厚

往薄來柔遠常經彼使再來此不一報似非其義往年土木之事雖臣子痛心切齒皇上臥薪嘗膽之日然邊無儲蓄之素野有奔亡之憂將帥趨生士卒忘死爾者邊報稍急曾無一人敢言戰伐甚至張惶失措安邦大計諒不如是伏望皇上深惟曲慮量遣往和乃勅武臣修治軍實庶彼無可執之詞我有預爲之計帝曰卿言良是朕志定矣遂賜虜脫脫不花王可汗書曰朕自祖宗以來四裔來朝竝加恩待殊不遣使至彼以此和好久久保全比歲可汗太師累使朝貢朝廷嘉厥款誠頻使還荅豈期荅使貪功嗜利

激怒可汗太師致使前日暫失歡好以天之靈要約如故朕與可汗可不思所以保終之使至業厚宴勞所賜可汗若可汗妃有金銀及金銀器皿織金蟒龍文綺等物卽付領去自今但可汗使來朕終始善視决不食言六月戊辰朔日當食不食七月以邊儲不給許納粟補官八月壬申南京地震十月監生郭祐疏言曩以太上蒙塵門庭有寇謀國大臣欲紓急難令民納粟者賜冠帶今軍旅稍寧行之如故農工商販不分賢愚惟財是授使之驕穉親戚欺誑鄉里又有贓污之吏罷退爲民欲掩鄉閭之耻納粟納草冠帶而歸何前日以財去職今日以財得官堂堂天下藏富於民未有不得已之時而有此輕名爵濫章服之意是以空乏示敵益啓寇心願裁止自今下大臣議寢不行湖廣麻陽縣教諭章泰言三事其一曰願陛下孝孝百行之本也曩上皇北狩陛下仰承母后俯詢群臣以登大位臣竊以天意人心與祖宗所以責望陛下者誠愈重而愈難視昔從容繼統故自不同願陛下師文王之敬止朝問定省以承大內兩宮之心其二曰願陛下弟詩云凡今之人莫如兄弟仰惟宣宗皇帝篤生胤嗣惟上皇與陛下而已陛下莅

藩之初上皇留止京師豈不以手足情親不忍違遠
冀得時晤日見今鑿輅復還二聖重權臣願陛下體
昔上皇友愛之心師古帝王因心之仁以父道尊事
上皇用子道教育儲聖百凡恩禮無替有隆三日願
陛下武奮發威斷義理所安信之不疑行之必毅中
外曉然明知意嚮依憑城社者不敢肆昔日陰竊之
奸啗餌權勢者不敢萌昔日蘿附之詭則彼無厭醜
虜自凜然有虎豹在山之懼用以克戡大憝且無難
者下大臣議謂今上已行不須瀆聽十一月太上皇
聖節禮部請令群臣朝廷安門命罷

三年正月太上皇居南宮石康縣流賊入境攻掠縣
治二月太上皇第五子見澍生四月帝有意廢東宮
立其子見濟未敢發也太監王誠舒永請先賜諸大
臣金於是賜少保戶部尚書兼文淵閣大學士陳循
少保戶部尚書兼東閣大學士高穀人白金百兩吏
部左侍郎兼學士江淵禮部左侍郎兼學士王一寧
戶部右侍郎兼學士蕭鎡翰林學士商輅人白金五
十兩顧亦未敢發有思明府都指揮黃玠以罪繫廣
西獄上書請立帝子爲皇太子帝喜下廷議皆請從
玠請遂先置東宮官屬諸臣皆兼保傅等官支二俸

以悅群臣之心京師爲之語曰朝盡傳保部兩尚書
五月甲午廢汪皇后立見濟爲皇太子冊見濟母妃
杭氏爲皇后改封太上皇帝皇太子爲沂王封次子
見清爲榮王見淳爲許王六月大雨浹旬河決沙灣
八月命都察院副都御史洪英等十七人分行天下
考察官員九月南京錦衣衛鎮撫司軍匠餘丁華敏
言臣竊見近年以來袁琦唐受喜寧王振等專權誤
國俱已敗露天下共知也臣草茅賤陋切見內官苦
害軍民事非一端恨在朝文武臣僚緘口不言不勝
痛哭流涕不惜一朝之命圖安萬乘之國臣切見內
官收積家財金銀珠石動以萬計豈能天降地出非
盜府庫則浚民膏害一也侵牟公侯房屋興造勞擾
害二也名爲家人義舅外親莫不輕肥縱橫恣睢凌
擊甚至入貲求仕莫差貴賤害三也蓋造佛寺用費
不訾以一已之私破萬家之產害四也廣置田租寄
戶郡縣繇賦丁力不應科征害五也家人中鹽虛占
鹽數轉鬻與人先得勘合倍支鉅萬壞國家權法奪
商賈之利害六也奏求塌房邀接客旅倚勢賒賣負
賴不還害七也賣放匠人名爲伴當辦納月錢內府
監局乏人造作工役煩楚不堪害八也家人包攬各

色物件官府畏懼以一科十害九也董監工之役非法酷刑軍匠塗炭不勝嗟怨害十也伏望皇上鑑前車立後軌毋使蕭牆禍稔帷幄奸生令曹節侯覽復見今日下禮部寢之以南京地震雷擊獸吻江淮以北直至濟寧水漲滄沒禾稼房屋東昌府連接河南地方黃河奔決勅太子太保兼都察院左都御史王文巡視整理監察御史劉琚等言近者災異見示非常臣等切惟文武群臣德行才猷靡所表建而師保兼官祿俸加倍侈必費財費必傷民近者戶部奏今年京師支放會計米銀動以千萬府庫將空欲將被災田地覆勘追徵與其剝疲民之財孰若省重支之俸伏望聽群臣挹損辭讓亦消弭一端命關支兩俸者暫停其一年豐仍舊十月太僕少卿黃仕雋言臣訪得各處巡撫考察州縣官吏每憑里老以為去留聞里老多因前官縱容往來囑託公事經攬收物營求催辦害衆成家積有年歲間有端已臨民輒貽怨恨反加誣污巡撫官輒因黜罷州縣官員一聞考察將臨盛設酒席邀求泣訴賄之錢帛以此多得保留否則去之殆盡用是里老有權官司受制無籍刁民妄行告害亦繇於此乞勅該部移文所在巡撫分豁

詳審或彼此互詢或稠獨交察或獨步暗行或遙審面辯毋徒取迎送隨從電過風飛使猫鼠一家奸犬同害疏入命考察不實者坐之仕雋復言巡撫朝廷重臣三司所行多被掣肘况在任年久或變節怠終昔唐玄宗謂張說曰向令十道使出巡諸州以察善惡茲因東封始知負朕多矣今豈無如前所云乞勅所在巡撫大臣惟總大綱無親細事惟從輿論無執私見其事安民安之處可無巡撫亦令多官集議暫從省革從之也先遣使臣來朝貢馬復奏求中國使臣往報不許勅沿邊總兵官防備之鳳陽安慶浙江湖廣諸府旱十一月己未朔日有食之太上皇帝萬壽節群臣請賀延安門詔罷也先復遣使二千餘人入貢太子太保兼工部尚書石璞疏言邦畿千里萬國瞻依禮樂刑政胥繇此出乃盜賊橫發披甲戴兵明火劫掠近聞所獲強盜俱言誰不懼死但以糧賞不得全關妻子饑餓難忍復審口外邊軍夜行日伏偵探虜情乃其月糧亦行減去致令窘迫是啓盜端實非儉道與減士饗寧損臣俸又聞山東河南南北直隸等處今年多被水患小民缺食盜賊潛起福建浙江蔓延可畏乞勅吏兵二部省冗濫去蠶食其文

武官俸糧六品以下者如故五品以上斟酌減支量
添軍儲尤望被災州縣蠲其徭稅暫停一應軍需遣
一二大臣巡視賑濟下多官集議以聞詔文武官俸
祿如故有冗員酌煩簡量省之十二月令布政按察
二使有缺三品以上連名會保以征湖廣苗賊功陞
保定伯梁瑤爲保定侯右都督毛福壽爲南寧伯
四年正月太上皇居南宮河復決沙灣三月大隆福
寺成寺甲京師費以數十萬四月復築沙灣決口辛
丑月食五月以黃珖爲都督同知名至京師管事前
府其家人繫廣西獄者俱宥之七月旱八月工科給
事中徐廷章言師保之位非具經綸調變之才不可
輕畀今每部增尚書一員都察院增左右副僉都御
史三十餘員又復徧加師保銜階高華猥濫所宜慎
重十月以右春坊右諭德兼翰林院侍講徐有貞爲
都察院僉都御史往治沙灣決河十一月太上皇萬
壽節群臣請賀詔罷帝所立太子見濟薨諡曰懷獻
五年正月太上皇居南宮以山東河南連年水旱遣
平江侯陳豫太子少師吏部左侍郎兼翰林院學士
江淵往撫安之二月建昌武昌漢陽疫京師陰雪彌
月淮徐蘇松等府積雪小民餓凍死者甚多四月

午朔日食五月禮部儀制司郎中章綸監察御史鍾同竝請復東宮下錦衣獄南京城內火焚民居六十家死者三十餘人六月以雲南左布政使賈銓湖廣右布政使馬謹右參政徐備按察副使陳質定州知州王約清苑知縣吳宗慶治績有稱賜誥勅封贈及

二代陞左都督方瑛為南和伯賈銓邯鄲人未樂甲申進士自刑科給事

出為大理知府潔已平政化洽上下會王驥征麓川兵興數年大理當要衝銓給軍不乏加陞參政仍掌府事已再陞為左布政使景泰四年入覲賜宴陞副都御史巡撫山東兼巡河南往來二省便宜行事銓為政務實取名人有稱其善政推而不受以歸諸其僚屬成化二年召還理院事尋卒諡恭靖馬謹新樂人宣德丁未進士授監察御史巡按浙江等處所至克振風裁正統中吏部尚書郭璉奏選為驗封郎

張善御史侯往總軍事兼督糧餉謹曰苗衆之叛

罪在有司橫征暴斂誰則不變盍先諭檄安輯降附負固弗庭然後動兵衆如其言不數日來降者數千謹分布給賑乃與善等督兵出沅州綏寧等處破攻洪溪等寨擒斬之景泰中復與善等攻破騰婆等洞大小千餘寨已復與參將李震征青龍渡楊山等寨賊靖州石壁等寨賊武崗城溪平水山言騰馬等寨賊陞左布政復論功陞俸名入為左副都八月雲南御史巡撫河東天順初致仕壽七十餘

總兵官檻送賊子思機發至京師伏誅十月癸巳月

食十一月太上皇萬壽節群臣請賀詔罷十二月賜

少保兼兵部尚書于謙勅曰聞卿嬰疾朕心惕爾今

命醫往視賜卿白金五十并賜羊酒白粲卿其勉扶

副朕拳瞻

六年正月太上皇居南宮四月丙子朔日有食之太上皇第六子見澤生五月冊子虛為周王祁鎡為趙王祁鎬為荆王是月旱閏六月淫雨七月命翰林臣編纂宋元通鑑綱目監察御史倪敬等言天氣失調災異迭見雨水霖霑軍民艱難臣等敢直陳修省之助竊惟府庫之財不宜濫予游觀之樂不可無節曩因齋僧累出藏金易米供給米價湧貴不免損民異端惑眾無耕蠶衣食之勞征科徭役之擾厚之如此則遐阻遠漠櫛風沐雨之窮軍荒年歉歲趨事赴役之饑民又將何以濟之近聞起造燕室龍舡宴娛頻繁木石資餉為費不少恐非所以保聖躬隆聖德也帝曰朕知秦王仕潔薨八月廷杖南京大理寺左少卿廖莊降為定羌驛丞遂併杖章綸鍾同於獄中九月丁亥月食十一月太上皇萬壽節群臣請賀詔罷湖廣苗賊攻圍隆里新化銅鼓諸城命方瑛佩征蠻將軍印充總兵官往征之

七年正月太上皇居南宮命石璞撫安湖廣軍民二月皇后杭氏崩時兩京群盜充斥三月以辰沅有警勅石璞總督軍務四月湖廣賊首蒙能糾苗賊二萬攻圍平溪衛城守備都指揮鄭東等擊敗之官軍乘

勝追剿斬獲無算彗星見五月纂修寰宇通志書成
六月太上皇第七子見浚生是月淮安揚州鳳陽三

府大旱蝗徐州大雨水河南亦大雨河決開封河南

彰德渰沒無筭七月命伶人李安為錦衣衛百戶

惜兒自教坊入侍得幸故有是命封左都督吳安為安平伯兩畿山

東西江浙諸省蟲蝻旱疫八月廣西流賊破欽州虜

知州姜原性裁省天下添設官員九月戊子道錄司

右玄義仰彌高奏近聞東南蝗疫盛發河間等府旱

澇相仍而圻甸之間盜賊充斥八月二十九夜迅雷

雨雹九月初九太陽無光色紅如血薄暮太陰色亦

紅近者陰霾連日不散此殆囹圄冤滯之徵乞勅法

司明清庶獄詔曰朕屢命諸司平反諸獄今有逮問

未完速斷遣之諡宋臣文天祥曰忠烈謝枋得曰文

節十一月太上皇萬壽節群臣請賀詔罷十二月癸

亥帝有疾且以星變罷明年元會

八年正月太上皇居南宮是時帝疾不瘳儲嗣未定

內外憂懼在廷各懷擇君之意司禮監陳王誠與

大學士王文謀恥襄王子立之其事漸露太監興安

諷群臣請復迎立太上皇學士蕭鎡不可王文持兩

端丙子群臣聚而屬奏草於左掖門乞早建元良以

安人心左都御史蕭維禎請易建曰擇旣上奏不允
丁丑將郊帝力疾出宿于齋宮戊寅遣太子太師武
清侯石亨攝祭庚寅上不視朝者三日矣群臣復請
議立太子禮部尚書姚夔與大學士商輅議率百官
伏闕請辛卯集朝房夔屬輅奏草輅屬草曰陛下宣
宗章皇帝子宜復立宣宗章皇帝孫皆曰善疏具日
已暮皆出而石亨與徐有貞等夜奪門迎太上皇出
南宮卽皇帝位太上朝鳴鍾鼓帝曰于謙耶旣聞故
曰哥哥做好居數日太上語近臣曰皇弟食粥可望
差耳帝竟崩號廢帝戾邨王葬之西山憲宗十一年
上尊諡曰恭定康仁景皇帝改陵寢祭禮如諸陵先
是正統中京師小兒禱雨之謠曰雨地雨地城隍土
地雨若大來謝了土地雨御地弟音相近也蓋至是
驗云

名山藏卷之十三
 景帝
 三
 上居南城七年矣景帝伐宮樹錮宮門已無復天下
 意景帝病所立太子薨上太子久廢司禮監太監王
 誠與大學士王文等謀迎立襄王子未定群臣且上
 章請惟景帝所立都督張軌與其弟輓武清侯石亨
 太監曹吉祥謀請上復位鴻臚主簿萬祺知祿命告
 亨曰皇帝在宮奚事他求亨告太常卿許彬彬曰社

名山藏卷之十四

臣何喬遠恭輯

典謨記

英宗睿皇帝

英宗睿皇帝
 上居南城七年矣景帝伐宮樹錮宮門已無復天下
 意景帝病所立太子薨上太子久廢司禮監太監王
 誠與大學士王文等謀迎立襄王子未定群臣且上
 章請惟景帝所立都督張軌與其弟輓武清侯石亨
 太監曹吉祥謀請上復位鴻臚主簿萬祺知祿命告
 亨曰皇帝在宮奚事他求亨告太常卿許彬彬曰社

稷功也雖然彬老矣徐元玉才有膽盍圖之元王者副都御史徐有貞也亨等夜過有貞有貞曰太上出狩非以遊畋爲國家耳南宮雖錮民無離心奉以復辟天人同符在此時也一再日亨等復過有貞有貞升屋步乾象曰可矣在今夕相與密定計有貞曰今虜騎薄都城公總兵也莫若名備非常納兵闕中皆曰善遂倉皇出會曹吉祥及靖遠伯王驥都御史楊善兵部侍郎陳汝言等至長安門下門開亨等以兵千人入有出入者輒呵止之宿衛皆驚有貞收諸門鑰投水竇中時方四鼓天晦亨等亦恇惑有貞大呼

曰時可矣勿退率衆薄南宮門錮俄隱隱有開戶聲有貞使數人舉梁厲以衝門勇士踰垣入毀之城中黯翳軌等入乃燭太上皇燭下獨出曰爾何爲俯伏合聲請陛下登位揮士進輦皆驚顫莫能舉有貞挽之前擁上皇登遂夾輦行忽月星明輒上皇顧問有貞卿等爲誰各具官對昇導入自東華門門者呵之上曰吾太上皇也遂翼升奉天門諸臣推御座門中上升座鳴鍾鼓群臣之請立太子也景帝許以是日朝群臣皆待而帝不可起有貞等號曰太上皇復辟矣趣入賀舉朝震駭遂皆呼萬歲日中群臣各朝服

奉上登奉天殿行卽位禮時正月壬午日也是日命徐有貞兼翰林院學士參預機務於內閣執少保兼太子太傅兵部尚書于謙少保兼太子太保吏部尚書謹身殿大學士王文司禮監太監王誠舒良張永王勤等付錦衣獄頃之改陞有貞爲兵部尚書兼職視事如故陞許彬及大理寺卿薛瑄皆爲禮部右侍郎兼翰林院學士參預機務於內閣下故都督同知黃玘子指揮同知翰於獄謫戍之科道官劾大學士陳循蕭鎡商輅尚書俞士悅江淵侍郎王偉黨比王文于謙迎立襄王子事上命群臣廷治之告卽位于

宗廟陵寢詔天下曰朕昔恭膺天命嗣承大統十有四年民物康阜北虜爲變朕念宗社生靈親率六師以庶弟郕王監國不意兵律失御乘輿被遮皇天悔禍虜酋格心奉朕南還監國之人旣無復辟之意反爲幽閉之謀旋廢皇儲爰立已子惟天不佑未久而亡杜絕諫諍失德良多朝政不臨人心斯憤今月十七日朕爲公侯駙馬伯及文武群臣六軍萬姓之所擁戴請聖母皇太后祇告天地社稷宗廟以其日復卽皇帝位其改景泰八年爲天順元年大赦天下咸與維新咨爾萬方臣民同秉忠誠會歸皇極布告天

下咸使聞知封石亨爲忠國公張軌太平侯張軌文
安伯楊善興濟伯皆予世遷景帝杭后祔廟主於別
室陞曹吉祥嗣子錦衣帶俸指揮僉事欽爲都督同
知吉祥姪鉉及太監劉永誠姪孫聚蔣冕弟成業兄
成達俱爲錦衣世襲指揮僉事皆以迎駕功群臣雜
治王文于謙陳循罪言謙與王文江淵及太監王誠
舒良張永王勤景泰中串同故都督黃瑛構成邪議
更立東宮尋復逢迎廢黜汪后陳循蕭鎡商輅不能
阻又附之謙文舉用項文曜王偉古鏞丁澄等樹黨
行私比因景泰皇帝不豫在廷諸臣請立皇儲而謙
文誠良永勤意欲外向已見群情迎復皇上乃圖糾
合逆旅欲擒殺總兵亨等循鎡輅淵士悅偉鏞澄文
曜俱知不告言坐謙等謀反當凌遲循等知情故縱
斬死罪學士薛瑄請輕之乃命斬謙文誠良永勤于
市籍其家謫循淵士悅文曜充軍鐵嶺衛罷鎡輅偉
鏞澄爲民忠國公石亨言迎駕者於上封右都督孫
鏜爲懷寧伯董興爲海寧伯餘論叙有差凡奪門者
陞三級保駕守門者陞一級蓋三千餘人景泰中諸
群小皆伏誅增給石亨張軌祿命楊善理左軍都督
府事進封會昌伯孫繼宗爲侯予世榜示王誠于謙

罪于天下陞禮部儀制司郎中章綸爲本部右侍郎
二月以太后詔廢景帝爲郕王復號郕王母后爲宣
廟賢妃皇后爲郕妃懷獻太子見濟爲懷獻世子革
肅孝皇后諸貴妃封號徙王文于謙王誠張永舒良
家屬充軍口北開原等衛陞南京都察院右副都御
史軒輓爲刑部尚書命吏部右侍郎李賢兼翰林院
學士參預機務於內閣封都督曹義爲豐潤伯焦禮
東寧伯施聚懷柔伯調左副都御史王竑爲浙江參
政尋罷爲民不叙陞都督僉事石彪爲左都督同知
充遊擊將軍領兵巡哨大同月食郕王薨諡曰戾以

水蠲保定河間稅糧遣刑部侍郎周瑄往賑之畿內
饑順天民聰粥民四月賜褒勅特賜忠國公亨祿米
前後通三千石進封廣寧伯劉安爲侯廣西蠻賊黃
公好等叛總兵安遠侯柳溥討平之三日陞錦衣衛
指揮同知門達爲指揮使指揮僉事袁彬爲指揮同
知已巳立太子封諸子見潯德王見澍安王見澤崇
王封徐有貞武功伯陞李賢吏部尚書兼職如故因
命有貞兼華蓋殿大學士仍供文職于文淵賜勳號
散官奉書襄王瞻墀曰先帝惟叔父親宗室惟叔父
賢姪簡祁鈺宮得叔父陳言愍安二疏循覽再三比

於金滕皇太后感嘆不已叔父云欲朝覲姪亦喜見以篤親親卽時氣候清和敬遣太監時齋奉勅符若書迎請叔父從容就道姪竚俟叔父之至命石亨充總兵官佩征虜副將軍印搜虜於延綏命興濟伯善兼禮部尚書靖遠伯驥兼兵部尚書都督石彪奏巡撫大同副都御史年富違法繫治京師上問李賢富何如對曰其在大同公以斷上曰彪將惡其不利也名錦衣門達必審究之旣多誣賢曰欲卒白當再勸請遣給事中郎中二員上曰使武職一人同之不者彼謂文臣相黨命左僉都御史林聰賑饑於山東陞

都察院右副都御史耿九疇爲右都御史勅曰朕惟御史內糾百官外按方隅受朝廷耳目寄苟非其人曷任稱使景泰失政臺憲進選每出私門當官者或枉法鬻獄言事者或濟私罔上出巡者或張聲勢作威福官邪不做紀綱蕩然爾承朕簡必奉公正已督率咸脩御史不職爾等察舉爾等不職亦聽御史糾劾黜幽陟明國典斯在四月上名諸大臣曰中外民艱皆因有司匪人卿等審察先有犯贓復職及見任操行不端政績無聞老有疾者具以奏命內外法司審錄罪囚襄王瞻墀至見之武英殿勅刑部右侍郎

黃仕儁賑濟近畿山東饑民五月命都御史馬昂賑
饑山西以民饑減歲辦物料之半御史楊瑄上書言
石亨曹吉祥奪民田上示其章於徐有貞李賢皆曰
御史言正上嘉之六月彗星見室宿十三道御史張
鵬等以上嘉瑄合章糾石亨不法事章且上石亨懼
入譖上命叔鵬及瑄面詰諸御史於文華殿悉下錦
衣獄究主使者錦衣衛以右都御史耿九疇右副都
御史羅綺名上遂并下獄鞫之獄詞復言主九疇綺
者大學士有貞學士賢上命科道官劾有貞賢專擅
威權排斥勳舊并下獄復命吏部覈御史給事中年
三十五以上者留任事三十五以下皆外調之於是
給事中玘御史禎等四十餘人竝得調是日大風雷
雨雹發樹壞屋奉天門東吻牌摧毀乃降有貞爲廣
東右參政賢爲福建右參政九疇爲江西右布政使
綺爲廣右參政十三御史盛顥等調知縣楊瑄張
鵬謫充軍玘禎等復職如故命通政司左參議兼翰
林院侍講呂原於內閣參預機務薛瑄乞致仕許之
追贈故御史鍾同爲大理寺左寺丞命翰林院脩撰
岳正於內閣參預機務留李賢復爲吏部右侍郎彗
星示變占謂應在母后巳巳上親告于皇天上帝兼

為母后祈福誅左副都御史蔣琳梟其首貴州

貴州按察

僉事李叔義奏琳侍于謙商輅為親舊杖殺十揮千
百戶逼竄土官錮死守邊都指揮趙信擅籍其家懼
無罪者數十人番異喉按察使張海巡按御史靳敏
俱勒殺之且納海及指揮吳昇賂薦陞按察使都指
揮奸留苗賊男女市銀千餘兩誣叔義等以上私罪
命給事中汪浩同巡按御史楊貢往察覆章先後上
聞上曰琳貪淫暴惡又係姦黨錦衣衛即逮鞫之既
至訴叔義誣已且云貴州亂離之後邊事窘迫夷情
兇狠懲姦宜嚴故多怨謗浩貢因已就逮遂不公於
索驗且臣遠在萬里豈知于謙等不軌之謀上不聽
命廷鞫之坐琳謀殺人斬決七月復執徐有貞下獄
不待時遂命梟琳首於貴州

丙寅承天門夜灾丁卯上躬禱昊天上帝后土皇祇

曰恭惟皇眷命臣承統即位以來星變不消烈風震

雷拔樹壞屋午門吻牌摧毀承天門樓被災屢見變

異深懼不勝意者事天法祖未盡誠歟爵賞則罰未

當歟忠良未盡用姦邪未盡去歟所見不明信讒佞

歟節儉不崇侈財用歟徵斂倍尅之未息而刑獄冤

濫之未雪歟思過省躬仰體仁恩大赦天下伏祈曲

賜洪原用寧邦家臣不勝待罪惶懼之至復遣告于

太廟社稷山川勅諭群臣曰朕以菲德膺乾復祚圖

治雖勤應天無效六日丙寅承天門灾朕心震驚罔

知所措意者敬事天神有未盡歟善惡不分用舍乖

歟曲直不辨刑獄冤歟征調多方軍旅勞歟賞賚亡

度府庫空歟請謁不息官爵濫歟賄賂公行政事廢

歟朋姦欺罔附權勢歟群吏弄法擅威福歟征斂徭
 役之泰重閭閻田里靡寧歟讒諂奔競之倖進忠言
 正士不用歟抑文武有司闕葺酷吏貪冒無厭致軍
 民失所歟此皆所繇傷和致災而朕或未明也爾文
 武群臣股肱耳目休戚惟均果有直言必當無隱其
 或躬蹈前非亦宜洗心改之遂下詔大赦天下陞李
 賢為史部尚書兼翰林院學士掌文淵閣事調許彬
 為南京禮部右侍郎許彬寧陽人以舉人選入翰林
 譯字中永樂中進士改庶吉士
 累陞脩撰正統己巳陞大理寺少卿兼翰林待詔提
 督譯書英宗自虜地將還遣近臣迎駕彬請往謁見
 於宣府為英宗草罪己之詔繇是見知景泰未與石
 亨定復辟謀事成進禮部右侍郎兼翰林院學士入

閣至是調南禮部既行降陝西參政至乞致仕許之
 成化初復官仍致仕卒贈禮部尚書謚襄敏彬夙有
 文譽顧坦率無簡擇一時放蕩之士盡出其門飲酒
 吟詩議論疊疊不切於用晚預機務方欲謝絕平昔
 舊游惡其變態謗議坐騰命岳正仍於內府授內使書頃之外調
 為欽州同知軒輓乞致仕復以故廣平侯袁容庶子
 瑄襲侯富陽侯安順侯成山侯保定侯子皆許襲伯
 黜徐有貞為民金齒進封南和伯方瑛為侯封都督
 陳友為武平伯後軍都督石彪為定遠伯予世左都
 督楊能為武強伯右軍右都督李文為高陽伯俱流
 上諭戶部自遼東抵陝西邊軍良苦其遣給事中并
 司屬官各六人齎金分勞之人二金八月甲午以彗

星未滅躬禱于昊天上帝丙午月食安置王竑於陝西報書襄陵王冲炆曰日出視朝禮經所載古人君是常王念予朝昧爽侵冒風寒親親忠愛感德良厚九月命太常寺卿兼翰林院侍讀彭時於內閣參預機務封通許王子墮爲周王瀋王佶焯薨報代王仕壘書曰承惠菘菜楹桴雖王國佳產道遠人艱自後無再謫岳正充陝西衛軍十月賜故太監王振祭葬賜杭州府宋岳飛祠曰忠烈有司春秋祭彗星復見於角宿勅處士吳與弼曰朕惟勞於求人乃成無爲之治樂於忘勢斯致難進之賢聞爾與弼潛心博聞蘊藉抱略不求聞達嘉遜園丘睠茲高誼渴望來儀特遣行人曹隆往詣爾居徵聘赴闕仍賜禮幣以表至懷尚欣然首路副朕翹跂上謂李賢曰建庶人文垚與故吳庶人允熲媿屬淹禁且六十載親而亡罪朕不忍其久繫賢頓首曰堯舜之心也皇天后土太祖在天之靈實臨陛下遂白太后出之左右或言不可上曰有天命者任爲之乃居之鳳陽令有司給月米薪炭婚娶出入聽自便復給火者二十多人十餘人遣內使溥等六人守視使令勅群臣曰建庶人等幼累于前人拘幽至今朕欲群生皆得其所况懿親

哉憫此遺孤特從寬貸用加賚送聽從婚娶以演後嗣庶天下謂朕親親焉勅中外寺額曰真慶嘉福圓林觀音淨覺普壽南泉雲間慶寧永慶妙亨常樂顯寧惠明昭靈昭寧碧峰護國景會福嚴靈雲報因報國大勝清源普利英臺慈會興善淨業廣福崇化法空廣惠延壽龍泉普濟靜仁業慶龍興凡四十寺命工部爲忠國公造宅十一月上曰山東連年災傷民甚艱難雖已遣賑朕尚念之吏部其就於本布政司推選廉能官一員專行撫恤吏部舉右布政王宇遂以命之命左僉都御史王儉賑貧於徐州陞辭上曰

徐南北要衝民艱朕惻然設心賑濟毋恤庾倉定文官封贈誥勅例一品四道二品三品三道四品至五品二道致書襄王瞻墀曰茲予初度承惠多儀加以玲瓏碧玉之帶書曰分寶玉于伯叔之國予施叔父宜也乃承惠于叔父敬酬白金綵幣匪曰展親特表謝敬賜中外寺額曰清光永泰龍泉靈巖歸義隆安地藏重熙法幢延供華光普陀大雲海會智安福勝普應青塔陽坡穀積石佛夕照普安通法普仁嘉福法寧開化大寧法寶罔極永峯圓廣觀音顯法永福保安崇慶廣福圓真凡四十寺十二月封曹吉祥嗣

子左都督欽爲昭武伯虜寇莊浪等處命太傅安遠侯柳溥佩平虜大將軍印充總兵官右都督過興充副總兵都督同知雷通充右副總兵武平伯陳友充遊擊將軍往陝西勦殺之禱雪于宮中

二年正月庚申朔六科十三道劾兵部尚書陳汝言諸不法事文武群臣奉詔鞫實命固禁之己卯尊皇太后爲聖烈慈壽皇太后詔天下二月封都督同知楊信爲彰武伯韃賊入境命大同總兵官高陽伯李文遊擊將軍定遠伯石彪調領精兵往延綏等處會彰武伯楊信等禦之有斬獲上曰朕聞向者土木陣

亡官軍至今南山河南北一帶骨骸尚暴露甚憫然其命瘞收之三月廣西賊流劫博白及廣東寧川永安千戶所等處勅鎮守臨清平江侯豫山東東昌府青萊諸府故多安插夷人朕念東凶連歲民流離困敝恐因而相聚爲非勅至其往來飭兵盜生翦之四月乙丑皇太子初講學于文華殿戶部奏副都御史聰言山東諸郡縣逃亡死絕之數覈視皆實上曰稅糧草束急除之逃亡戶令有司盡心招撫東苗十三番賊首干把豬等僭稱僞號攻劫都勻等處命湖廣貴州總兵官南和侯方瑛調兵勦之石康賊攻破博

白縣勅曰近聞皇親公侯伯文武大臣中多有藏匿
罪人亡虜有令家人強占外州縣軍民田地有起蓋
房屋把持行市有詭名中鹽挾制官司者夫京師天
下本貴戚近臣四方視効欲無干朕憲在守位循禮
矣比會昌侯弟顯宗姪璘令家人私造房屋罔市利
朕不敢用外戚故屈法也諸臣有犯前所云者自首
免罪不首自發者罰無赦家人投托人皆永適戍邊
五月冊秦世子公錫爲秦王處士吳與弼陞見命爲
左春坊左諭德辭并封還勅幣不許遂見與弼于文
華殿從容顧問辭職之意上曰重卿學行特授宮僚

煩輔太子與弼終不受遂賜宴于文華復賜綵幣羊
酒薪米遣中官送至寓舍上謂李賢曰曩者奉迎之
人紛然請革邊巡撫今聞武官貪縱暴橫無所鎮壓
之朕乃知其謬卿與王翱馬昂仍擇可者遂命白圭
巡撫遼東王宇巡撫宣府芮釗巡撫甘肅陳翌巡撫
寧夏皆從各省布政使陞爲右副都御史以行李秉
巡大同則以右僉都御史往徐瑄巡撫延綏則以監
察御史往上曰有文臣則武臣不得遂私其卽日遣
召之已而馬昂言東苗十三番等賊急乃復以白圭
贊理貴州軍以太僕卿程信爲僉都御史代之安遠

侯柳溥敗虜于涼州都督同知雷通自永昌來援遇虜懷安站亦敗之七月賜吳與弼勅曰朕惟英君誼辟莫不好賢求士聞爾與弼懷抱道德嘉遜林丘特行徵聘惠然肯來深慰朕心用授春坊諭德煩輔東宮固辭難拒今仍遣行人送還故里賜爾銀幣復命有司月給廩米二石爾其優游桑梓尊仁樂義儻精力未衰尚無忘纂述輔教垂世以繼前賢虜欲寇寧夏命寧遠伯石彪充總兵官佩征夷將軍印左都督劉深充副總兵官往勦之勅三法司曰御馬監都指揮千百戶并勇士小廝自倚善騎射恃寵怙勢自今但坐事者不分輕重錄取上裁伶人有謀陞伶官者特發充邊軍上謂李賢曰朕念曹吉祥隨侍舊人每有干請多曲徇之吉祥不顧可否無厭足雖朕十不可二三四方奏事者不知謂必行往往造門求通朕斷以公道八月勅諭李賢彭時呂原曰朕欲覽于天下輿地之廣我文祖太宗皇帝嘗命儒臣未究厥緒景泰間雖已成書繁簡失當卿等尚折衷精妥繼成初志用昭我朝一統之盛九月復以軒輓爲南京都察院右都御史甲子駕幸南海子上謂李賢曰朕朝罷膳後閱章奏易決者下有司可議者送先生參詳

當乃出左右乃曰陛下自勞非養生道又曰內閣可無送朕荷天下之重五更二鼓起齋潔拜天畢省奏章既剖決謁奉先出視朝不爽于時度退朝召問大臣商略機務於文華復省奏章省訖還宮至申又如之暇則聽內政暮乃休母后所旦朝有命則問一日隆冬盛暑則五日左右亦曰陛下自勞非養生道賢對曰陛下孝敬精勤古賢君何以加此願持母衰上曰朕之行此亦有何勞便於安逸怠荒至矣十月鷹坊司內官請出獵不許固請許之上曰毋擾州縣朕跡爾矣內官至果多索有司禽獸以進曰獵所獲上

已訪知既反命杖黜之上屏左右問李賢政治得失賢極言官較出外逮籍罪人之弊上密察果然召指揮門達戒之曰敢有不悛罪毋赦戊寅幸南海子十一月分遣大臣禱雪于天地社稷山川以耿九疇爲南京刑部尚書詔訪舉精通天文歷數地理課命之術者送詣京師十二月以西師無功名柳溥還革其太傅閑住罷舉經明行脩賢良方正儒士脩萬工堰三年正月命法司錦衣秘獄無泄虜入安邊境總兵石彪等擊敗之都督僉事周賢死焉賜贈葬與陞襲慶遠同知葉禎率民兵擊賊死之贈廣西右參議賜

祠三月下右僉都御史李秉錦衣獄罷爲民四月增
建南內殿宇龍水縣獯賊鳳弟吉糾合廣西流賊爲
變兩廣都御史葉盛擊敗之名石彪楊友還論功進
封侯方瑛白圭勦東苗克之俘干把豬等于京師廣
西流賊糾廣東懷集縣獯賊攻破開建縣殺知縣典
史巡簡廣西猺獯苗賊出劫殺勅鎮守兩廣左少監
阮能朱詳總兵官左都督劉深副總兵都督同知歐
信等協心勦捕下雄縣知縣秦紘錦衣獄贖罪調邊
方五月禁商旅攜違禁物貿易諸夷中廣西流賊破
容縣劫潯梧柳慶南寧諸府州縣六月命巡撫官以

歲秋赴京師議事七月封幼墾爲藩王八月下石彪
錦衣獄勅曰我太祖高皇帝立綱陳紀照臨天下諄
諄誥戒董正百官製鐵榜以諭功臣當時臣下凜凜
然近來公侯駙馬伯五府六部都察院等衙門大臣
及近侍官員多不遵禮禁私相交往甚至阿勢泄事
因而結構百端卽如定遠侯彪圖謀鎮守令指揮等
官假進奏詞事發被劾輒有情熟近侍潛報消息官
之不正無此爲甚今後爾文武大臣無故不許往來
互通給事中御史亦不許私謁文武大臣敢有阿附
漏泄輕則發戍重處死錦衣衛指揮親軍近侍尤不

合與諸臣交通他衛指揮以下非出征時毋得輒候
公侯門違者如鐵榜處治田州府頭目呂趙殺知府
岑鑑瀋王之封也脩武伯煜刑科給事中儼實充使
既至受王饋上使較尉覘得之逮下獄書告宗室諸
王曰正統初勅朝使無得需索王府物犯者處死家
戍邊嚴矣脩武伯煜給事中儼近復玩無忌王府資
費有限豈堪如此念我親族申明舊例後有遣至者
飲饌之外毫無與也九月廣西流賊犯廣州界命都
御史葉盛并總兵鎮守等官調度所在官軍主兵勦
除調石亨家屬指揮僉事寧等十人於雷州等衛凡

繇亨進者皆降謫有差肅州火延燒五千餘家死者
六十餘人十月己未駕幸南海子命石亨閑住許冒
報奪門陞官者自首改正敢隱者罪益首改者四千
餘人十一月勅諸王毋干預有司事湖廣旱饑命設
策撫賑光祿寺請陶器於饒州凡十三萬三千有奇
工部請減八萬以紓民從之十二月月食

四年正月己卯朔虜二萬寇榆林總兵官彰武伯楊
信禦之有斬獲下石亨獄籍亨及彪家上諭李賢曰
天下諸司朝覲大集旌異之典當如祖宗之故既吏
部舉右布政使賈銓梁燊蕭肅徐景李顥按察使劉

致知府丘陵胡濬知州張福知縣張暄等十人各賜
錦衣一襲鈔千貫宴禮部隨擢胆爲禮部尚書銓爲
副都御史二月廣西獍賊流劫永州攻破桃川枇杷
三千戶所永明江華二縣石亨死獄中誅定遠侯彪
癸酉幸南海子致書襄王瞻塘曰叔父欲朝朕亦欲
一會敬遣太監定奉勅符金牌迎請可從容就道從
行人數惟叔父所定廣西蠻賊破信宜縣三月己卯
幸南海子辛卯幸仰山窪協贊廣西軍務監察御史
吳禎平呂趙斬之四月襄王瞻塘來朝命宗室王府
無子者方許請繼室子八歲方許請名女子歲十五
方許請封著爲例致書襄王瞻塘曰叔父來覲臨闕
屢聞嘉言裨益良多及叙親情乃知世子妃病未有
出而庶長子已十歲知向學朕甚喜之重闈之下宜
有令孫茲特立見淑爲襄世孫以遂叔父裕後之懷
叔父母遂復書曰朕念叔父國家至親雅有賢譽宜
享優游之樂每歲秋冬間可出城遊賞三五次或世
子郡王從亦可玩覽山川獵取禽獸暢懷怡情焉乙
卯王辭上送至午門外握手泣別王拜上亦拜王起
行數步顧且拜上使中官掖之王起行顧且拜者以
十數上目送出端門六月月食七月乙亥朔日有食

之上患脚氣不朝者累日甲午朝朝罷召李賢王翱馬昂愍問良久賜金若宴湖廣當造紙工部言楚饑請成造於不災州縣上曰皆罷之八月命湖廣有司加意恤賑其租稅上諭戶部曰四方奏報水旱民多困苦朕甚憫焉其移文巡撫巡按官覆視災傷甚者租稅悉除輕者量蠲之不能自給者速發廩賑濟禁假較尉行事害人者虜酋孛來大舉入寇自大同威遠西擁衆南行已直抵鴈門關代朔忻州一帶遣都督顏彪馮宗領兵往備之上召李賢王翱於武英殿曰戶兵二部缺侍郎誰可賢曰副都御史白圭可兵

部翱曰故南京戶部侍郎馬諒服除可戶部遂用之九月趙王祁鎡薨虜圍大同右衛命撫寧伯朱永都督白玉鮑政統領官軍巡邊於宣府十月閱騎射西苑賜總兵官會昌侯孫繼宗等宴鈔騎射官賜鈔有差謂學士李賢彭時呂原尚書王翱馬昂曰爲國重武練武先騎射皆頓首稱善遂皆錫宴鈔戊辰幸南海子十一月復閱隨操武臣侍衛勇士賞賜降將領一等閏十一月予襄王瞻墀書曰承惠藥及方已祗領惟衛生之術先資藥餌而方書不下數十家非考閱參驗之至疇得要且良叔父明達仁恕留心於此

良方佳劑親愛惠予感愍之深布此以謝庚戌幸南海子戊午曉刻日食四分有奇掌欽天監事禮部侍郎湯序不預奏上切責之李賢曰天戒有在人君正欲因而儆懼湯序奸不忠乃不奏聞序凡遇災異皆隱不言見象變必曲解說或將天文書所載不祥語改削進遇吉兆卽詳呈序奸不忠無所容遂及監正副等官皆執下獄因降序爲太常少卿己未幸鄭村垣閱仗馬十二月鎮守大同總兵高陽伯李文太監陳瑄屢爲虜所掩襲不實奏下獄治罪巡按浙江監察御史閻鼎言聞辦銀課內外等官擾害軍民狀忤

旨下獄已降爲平南主簿上召李賢曰吏部缺侍郎尚書王翱老當得一人佐之其與訪擇明日以副都御史崔恭奏上曰善因論徐有貞才自金齒放還家鞏昌同知崔達任滿鞏人乞留爲其知府從之是歲賜致仕四川按察僉事王琦金以周其貧

五年正月壬寅朔遷代府山陰襄垣於蒲宣寧隰川於澤靈丘於絳懷仁於霍大理少卿李茂卒上諭李賢曰大理法官今雖有寺丞二人名位輕恐不敢與法司持辯卿與王翱擇明日以故大理卿李賓奏上曰善二月諭李賢曰錦衣指揮遂杲誣弋陽王奠璽

敗倫醜事今云不實宗室如此它枉行多因下諭曰
 刑獄國重事今後陳寃者三法司當審辨毋畏嫌避
 疑遂遣右副使李廣駙馬都尉柳錦與杲復往勘之
 命都督僉事顏彪佩征夷將軍印充總兵官征勦兩
 廣僮賊四月虜犯莊浪鎮守都督僉事林宏等擊却
 之勅遊擊將軍都督同知和勇統領兩京達官旗軍
 殺賊於兩廣脩大明一統志成御製序上諭李賢曰
 軍官季俸至關銀十四萬餘府庫入少出多奈何賢
 曰自古國家冗食是患今衛官二千有餘員冗矣上
 曰令兼支布錢則何如因召賢與吏戶兵三部尚書

議曰議畢且復下廷議不者不惟歸怨朝廷亦怨于
 爾輩五月中官過南雄有所索於知府劉實不得中
 官怒叱摔之遂與中官交訟上竝逮治京師上親聽
 之論治中官罪弋陽王奠壘竟為遠杲所誣賜自盡
 六月虜大犯涼州莊浪命兵部尚書馬昂總督軍務
 懷寧伯孫鏗佩平虜將軍印充總兵官右都督馮宗
 充副總兵官都督僉事鮑政充左參將趙勝充右參
 將統京師精銳騎馬萬五千往擊之李賢及會昌侯
 繼宗吏部尚書翺兵部尚書昂以所在兵災人民艱
 窘請下寬卹以蘇疲困許之命花木鳥獸梨板及追

馬清匠制卷採柴之役悉停罷蓋所罷皆民最苦而採柴之役歲省可三十餘萬時所在告訐及採訪事情皆即遣錦衣官較籍其家李賢言其多枉因勅法司情重者奏請餘悉發巡按御史及所司問治七月昭武伯曹欽有罪下諭文武群臣欽等遂與司設監太監吉祥反恭順侯吳瑾廣義伯吳琮以聞命懷寧伯孫鏜等率官軍討之欽殺左都御史寇深及恭順侯頃之與其兄都督鐸弟指揮鉉及從兄都督濬皆為鏜所敗死執吉祥下獄磔于市并磔欽等屍以狗詔赦天下

寇深唐縣人永樂間為郡庠生鄉人有謀不軌者馳京師告發得為國子生宣德初

擢刑部主事正統中以右僉都御史鎮守四川松潘脩築關堡城池六十餘所哨臺三百七十餘處治餉道開鑿山泉諸蕃皆來送款以功陞左副都御史食二品俸景泰二年召還未踰月復奉命提督遼東軍務捕獲妖賊李福惠分遣將士擒斬入犯虜遼左以寧英宗復辟陞左都御史至是為曹欽所殺贈少保諡莊愍深強勁敢任然無學術重以貪鄙殘刻朝士有忤之者睚眦必報初詔事曹欽父子已而踈之故及詔曰凡朝廷得失生民利病百僚貪暴奸邪於禍及詔曰凡朝廷得失生民利病百僚貪暴奸邪近侍風憲職皆當言近多嘿嘿畏避權勢今後亡諱不當者亦不罪寇深既遇害上諭李賢與六部公舉可都御史者皆薦南京刑部尚書蕭維禎上曰非端士也賢曰大理卿李賓司刑日久其年尚少容止老成上曰善遂用之

李賓順義人正統乙丑進士初授監察御史伉直著名超遷太僕寺

卿尋轉右副都御史提督永平山海諸處軍務兼理糧餉天順初改大理卿丁父母憂兩奪情曹欽及賓率子弟家人挺身奮擊賊平陞右都御史成化改元南都大饑江中盜起陞賓南京兵部尚書滿考來京雷改左都御史掌院事刑襄流民嘯聚賓請命都御史原傑撫視之進太子少保賓剛簡鎮默留心公事每當議政動中機宜錦衣門達有罪廷訊強辨至賓前曰公宜訊我遂引服成化中有奏楊榮曾孫畢不法者賓言榮有功朝廷其子孫當寬處之會畢以逃難至京詞連二三大臣賓與焉賓恐得自陳致仕卒贈太子太保諡襄敏

河南水黃河溢漲汴襄間渰沒官民廬舍多死者命工部右侍郎薛遠往視之進封懷寧伯為侯止其擊虜之役而使馮宗佩平虜副將軍印充副總兵趙勝充左參將與都督僉事李果充右參將統故所選京師軍往擊之命兵部右侍郎白圭起軍

為左副都御史俱參贊軍務八月追封吳瑾為涼國公子諡賜葬加吳琮歲祿二百石賜寇深贈諡祭葬加李賢太子少保九月蘇州濱海諸縣潮挾雨大至死者萬餘人命賑恤之虜犯永昌山丹抵甘右參將李恭等追禦之有斬獲十月致書襄王瞻塏曰朕念宗室至親賢無如叔父茲仰體情尚製神像畫軸服飾器玩數十品物雖不腆工作頗精朕復製詩賦數首用寫名藩山川風景之勝以寓嘉美至可日入復設飯堂于南京給孤貧日二粥如永樂中故事十一月丁酉朔日有食之壬子月有食之壬戌幸南海子

上諭李賢曰左右群小日見吉祥敗稍斂戢近又放縱朕恒戒之曰卽如吉祥豈無功哉一旦犯法不得赦也蓋朕未嘗忘南城時賢對曰善上曰朕五鼓拜天雖足疾不廢拜畢閱章奏亦拜于八廟出則視朝退朝母后畢復視政旣罷進膳飲食未嘗揀擇衣服亦隨宜雖衣布天子也又曰朕宮中讀書觀射如鍾鼓司承應朕唯時節奉母后無事竝不聽觀因與李賢論六部諸臣慮吏部尚書翺老賢刑部尚書瑜工部尚書榮而弱禮部尚書瑁十二月定贖罪例京師多盜命盜發執巡城御史下獄錦衣官較及兵馬司

官皆鎖項捕盜著爲令乙亥幸南海子釋陳循爲民六年正月丙申朔程鄉賊羅劉寧等糾海賊攻燒揭陽賜興定縣劫倉庫復攻圍長樂縣參贊機務右侍郎白圭左副都御史王竑等分兵巡邊適虜分道寇固原圭竑與馮宗李杲分擊之有斬獲賜獎勅諭天下提督學較監察御史等官陳政等朕惟自古帝王率以興賢育材爲首務學較廢興人材之盛衰治道之隆替係焉曩嗣位之初爰簡學行老成之士授以憲職俾專學政行之十餘年厥有成效景泰中罷去而廢壞日甚今復行舊典命爾等往爾其欽哉夫是

一方表率也率人必先己其務端軌範嚴條約公勸懲俾崇于正學迪于正道庶稱朕簡任之意顏彪等勦潯州大藤峽等處獐賊攻破七百二十一寨斬首三千二百一十七級復所掠男婦五百餘口賜獎勅蜀王悅劾薨三月皇第九子生虜寇靖虜境都指揮汪禮逐出之召馮宗趙勝白圭還勅王竑李杲暫留防守四月上召禮部尚書石瑁瑁趨疾上諭李賢曰石瑁動止粗疎不稱宗伯朕欲以戶部侍郎張睿易之賢退語瑁瑁求去上曰瑁大臣也為人誠豈可坐小失退因留如故而以睿為戶部尚書五月端午賜

群臣扇及宴扇題御製二詩分賜諸大臣顏彪等勦龍山等處獐人直抵潯梧廉諸處皆擊勝之賜獎勅禁在外大小衙門毋增置夾棍等件刑具八月虜入獨石馬營命脩牆垣屯堡墩臺壕塹于諸邊九月乙未聖烈慈壽皇太后崩壬申上御西角門諭禮部曰大行皇太后遺誥服制二十七日除朕不忍朕仍素冠服視事西角門爾群臣以素服朝參待山陵祔廟畢乃用淺色衣服以朝都指揮僉事門達請別置錦衣獄從之時達掌錦衣遣較尉四出獄訟甚繁云征進兩廣總兵官顏彪贊理軍務右僉都御史葉盛等獻所殺潮州反賊

羅劉寧廣西龍山等處徭獯韋公立等首三十五級
十月上大行皇后尊諡曰孝恭章皇后詔天下十一
月甲午合葬於景陵庚子祔廟嚴捕私鹽船令

七年正月郊上病足掖而就事二月會試天下舉人
試院火死者九十餘上憫之命無物色者有司具木
瘞之朝陽門外爲六大塚題曰天下英才之墓改試
於八月致書襄王瞻墀曰朕惟叔父在懷茲特送袍
帶數事以識愛私叔父鑒之荆州知府張岳九年考
滿荆人奏留許復任上諭李賢曰近聞空中有聲天
譴也宜祈禳賢對曰考之於書無形有聲名曰鼓妖

君不卹民天下怨叛則妖生焉乞行蠲恤之政上曰
朕心也三月頒蠲恤詔于天下封蜀世子友垓爲蜀
王四月辛未奉孝恭章皇后主太廟廣西流賊攻破
岑溪鬱林五月己丑朔日有食之閏七月追上胡太
后尊諡脩其陵寢改殿試于明年裕州知州秦永昌
以貪酷伏誅河南前後巡按御史布政按察二司官
皆坐罪八月代王仕壘薨九月四川賊悟真等據岳
池流劫榮昌遂寧銅梁等縣廣西流賊縱劫廣東雷
廉高肇諸府切責總兵官泰寧侯陳涇會廣東副總
兵都督同知歐信等勦之十月復書襄王瞻墀曰近

令庶子德王見潯出府荷叔父賜誨靡匪格言頡謝
 叔父之嘉訓僉都御史葉盛言潮陽知縣陳瑄能撫
 亡而勦寇以為潮州試知府廣賊流劫廣東廣州甚
 亟勅巡撫廣西僉都御史吳禎節制兩廣軍與廣東
 鎮守官計擒之十一月萬壽節禮部請賀上曰母后
 違養未及大祥朕何忍哉至期御奉天殿群臣如朔
 望儀金華民訴其知府瑄貪酷者上密遣官較察之
 曰卽不實亦械至調都指揮袁彬於南京錦衣帶俸
 閑住巡按四川御史斌故善漏刻博士誠誠使蜀府
 斌從誠所受賄賂事覺下獄上曰其拷訊令言御史

行人進士使出似此受贓者有幾若不得問問官罪
 無赦十二月初以較尉言巡按雲南御史祚貪清軍
 御史萬鍾淫逮下三法司錦衣具獄上命更訊祚萬
 鍾如其貪淫者有幾蓋上嚴墨吏之誅曰貪風息則
 天下治韓雍謁陳循墓詩序曰先生平生薦賢一惟
 至公門下稱為得人至南陽李原德相繼執
 政士君子自重者多不得進而乞哀奔競之徒皆相
 率向用清議為之不平既出其門者多以賂敗英廟
 知其為人將圖顯黜而賓天矣使假以數
 月原德必不免于殞身欲優游考終得乎是歲廣西
 流賊突入蒼梧城總兵官陳涇不敢戰致仕左布政
 朱欽出諭賊賊殺之

八年正月乙卯上不豫己未召太子視事文華殿廣

西流賊夜入清遠衛執都指揮尹通按察僉事王鼎
蠻賊破懷集縣及梧州府己巳上大漸召諭皇太子
及太監牛玉於榻前除妃嬪殉葬令命斂衣服毋用
多庚午上崩下遺詔二月乙未上尊諡曰法天立道
仁明誠敬昭文憲武至德廣孝睿皇帝廟號英宗五
月庚申葬裕陵壽三十八上閑習騎射時御琴書自
奉儉約宮壺嚴於外廷臨朝淵默岳峙近侍莫窺其
際百司奏章一覽卽記親自裁決無所旁落嘗與李
賢彭時講論時事賜賢其所食菓至親納之袖中至
其敬天之誠勤民之切臣品心術悉知高下事皇太

后之孝待襄王叔父會昌侯元舅之情禮兼至所以
處宗室戚畹不用恩掩義一代稱聖主焉

臣喬遠曰上始卽位十有四年北廷兩歲南宮七載
豈非天哉自古人君憂患困橫未有如上者也其初
冲年嗣統雖賴三楊輔以簡靜邪閹王振尚得干其
間復辟以後總覽明察內臣莫敢奸外臣莫敢貪至
其釋建庶人之囚復胡皇后之號罷殉葬之令廟號
曰英信不誣也孟氏稱動心忍性直其然乎



山莊

卷六十四

英宗

三

享和癸亥



望月氏藏弄



